



UNDANG-UNDANG MALAYSIA

CETAKAN SEMULA

Akta 276

AKTA BANK ISLAM 1983

Mengandungi segala pindaan hingga 1 Oktober 2008

AKTA BANK ISLAM 1983

Tarikh Perkenan Diraja	9 Mac 1983
Tarikh penyiaran dalam <i>Warta</i>	10 Mac 1983

CETAKAN SEMULA YANG TERDAHULU

Cetakan Semula Yang Pertama 2006

UNDANG-UNDANG MALAYSIA

Akta 276

AKTA BANK ISLAM 1983

SUSUNAN SEKSYEN

BAHAGIAN I

PERMULAAN

Seksyen

1. Tajuk ringkas dan pemakaian
2. Tafsiran

BAHAGIAN II

PELESENAN BANK ISLAM

3. Perniagaan perbankan Islam diuruskan hanya oleh sesuatu bank Islam berlesen
4. Menteri boleh mengubah atau membatalkan syarat lesen
5. Lesen tidak boleh diberi dalam hal tertentu
6. (*Dipotong*)
7. Pembukaan cawangan baru
8. Bank Islam boleh mengadakan pertalian perbankan koresponden dengan bank di luar Malaysia
9. Fi lesen
10. Sekatan terhadap penggunaan perkataan tertentu dalam nama bank Islam
11. Pembatalan lesen
12. Kesan pembatalan lesen
13. Penyiaran senarai bank Islam
- 13A. Nasihat Majlis Penasihat Syariah

BAHAGIAN III

KEHENDAK KEWANGAN DAN KEWAJIPAN
BANK ISLAM

Seksyen

14. Penyenggaraan kumpulan wang modal
15. Penyenggaraan kumpulan wang rizab
16. Peratusan aset cair
17. Juruaudit dan laporan juruaudit
18. Kunci kira-kira yang diaudit
19. Statistik hendaklah diberikan
20. Maklumat mengenai cawangan di negara asing

BAHAGIAN IV

PEMUNYAAN, PENGAWALAN DAN
PENGURUSAN BANK ISLAM

21. Maklumat mengenai perubahan kawalan bank Islam
22. Sanksi dikehendaki untuk membina semula, dsb., bank
23. Kehilangan kelayakan pengarah dan pekerja bank

BAHAGIAN V

SEKATAN MENGENAI PERNIAGAAN

24. Sekatan mengenai pembayaran dividen dan pemberian pendahuluan dan pinjaman
25. Larangan mengenai pemberian pinjaman, dsb., kepada pengarah, pegawai dan pekerja
26. Sekatan mengenai pemberian pinjaman, pendahuluan atau kemudahan kredit di bawah subseksyen 25(4)
27. Sekatan kredit kepada seorang pelanggan
- 27A. Pengawalan had kredit
28. Penzahiran kepentingan oleh pengarah
29. Pengehadan mengenai kemudahan kredit bagi maksud membiayai pembelian atau pemegang syer
30. Bukti mengenai pematuhan seksyen 24, 25, 26, 27 dan 29

BAHAGIAN VA

PERNIAGAAN PERBANKAN ISLAM ANTARABANGSA

Seksyen

- 30A. Larangan menjalankan perniagaan perbankan Islam antarabangsa
- 30B. Permohonan bagi lesen untuk menjalankan perniagaan perbankan Islam antarabangsa oleh orang selain bank Islam berlesen
- 30C. Menteri boleh mengubah atau membatalkan syarat lesen yang diberikan di bawah Bahagian ini
- 30D. Lesen di bawah Bahagian ini tidak boleh diberikan dalam hal tertentu
- 30E. Pemakaian peruntukan Akta ini kepada bank Islam antarabangsa

BAHAGIAN VI

KUASA PENGAWASAN DAN PENGAWALAN KE ATAS
BANK ISLAM

- 31. Penyiasatan mengenai bank
- 32. Penyiasatan khas mengenai bank
- 33. Pengeksekutuan buku dan dokumen bank
- 34. Kerahsiaan bank
- 35. Tindakan yang hendak diambil jika pendahuluan adalah bertentangan dengan kepentingan pendeposit
- 36. Bank yang tidak berupaya menunaikan obligasinya hendaklah memberitahu Bank Negara
- 37. Tindakan oleh Bank Negara jika bank tidak berupaya menunaikan obligasinya atau menjalankan perniagaan secara yang memudarat kepada pendeposit
- 38. Kesan pemecatan jawatan pengarah atau pelantikan seseorang pengarah sesuatu bank oleh Bank Negara
- 39. Pengawasan bank Islam oleh Bank Negara
- 40. Bank Islam di bawah kawalan Bank Negara hendaklah bekerjasama dengan Bank Negara
- 41. Peluasan bidang kuasa kepada subsidiari bank
- 42. Moratorium
- 43. Pindaan perlembagaan bank

BAHAGIAN VII

PELBAGAI

Seksyen

44. Indemniti
45. Keutamaan deposit Islam
46. Penalti terhadap pengarah dan pengurus
47. Kesalahan oleh pengarah, pekerja dan ejen
48. Kesalahan oleh syarikat dsb., dan oleh pekhidmat dan ejen
49. Kakitangan dilarang menerima komisen
50. Penalti am
51. Kuasa Gabenor untuk mengkompaun
52. Keizinan Pendakwa Raya
53. Peraturan-peraturan
- 53A. Kuasa untuk mengeluarkan garis panduan, dsb.
54. Hari kelepasan bank
55. Pemakaian undang-undang lain
56. Pengecualian

BAHAGIAN VIII

PINDAAN BERBANGKIT

57. Pindaan Akta Bank 1973
58. Pindaan Akta Syarikat 1965
59. Pindaan Ordinan Bank Negara Malaysia 1958
60. Pindaan Akta Syarikat Kewangan 1969

UNDANG-UNDANG MALAYSIA

Akta 276

AKTA BANK ISLAM 1983

Suatu Akta bagi membuat peruntukan mengenai pelesenan dan pengawalan perniagaan bank Islam.

[7 April 1983, P.U. (B) 182/1983]

MAKA INILAH DIPERBUAT UNDANG-UNDANG oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti yang berikut:

BAHAGIAN I

PERMULAAN

Tajuk ringkas dan pemakaian

1. (1) Akta ini bolehlah dinamakan Akta Bank Islam 1983.
(2) Akta ini hendaklah terpakai di seluruh Malaysia.

Tafsiran

2. Dalam Akta ini melainkan jika konteksnya menghendaki makna yang lain—

“bank Islam” ertinya sesuatu syarikat yang menjalankan perniagaan perbankan Islam dan memegang sesuatu lesen yang sah; dan semua pejabat dan cawangan bank itu di Malaysia hendaklah disifatkan sebagai satu bank;

“bank Islam antarabangsa” ertinya mana-mana syarikat atau pejabat mana-mana institusi asing yang menjalankan perniagaan perbankan Islam antarabangsa dan memegang lesen yang sah di bawah seksyen 30B;

“Bank Negara” ertinya Bank Negara Malaysia yang ditubuhkan oleh Akta Bank Negara Malaysia 1958 [*Akta 519*];

“cawangan” berhubungan dengan sesuatu bank Islam termasuklah sesuatu cawangan bergerak bagi bank itu dan sesuatu cawangan yang ditubuhkan dan disenggarakan bagi sesuatu tempoh terhad sahaja;

“deposit Islam” ertinya suatu jumlah wang atau nilai wang yang diterima oleh atau dibayar kepada mana-mana orang, yang penerimaan dan pembayaran itu adalah mengikut terma suatu perjanjian yang dibuat di bawah mana-mana prinsip Syariah atas apa-apa asas termasuk jagaan atau perkongsian untung;

“institusi asing” ertinya suatu syarikat asing yang menjalankan perniagaan di luar Malaysia yang serupa dengan perniagaan bank Islam sebagaimana yang diperuntukkan di bawah Akta ini atau perniagaan mana-mana institusi berlesen di bawah subseksyen 6(4) Akta Bank dan Institusi-Institusi Kewangan 1989 [*Akta 372*];

“lesen” ertinya suatu lesen yang diberi di bawah seksyen 3;

“pejabat” termasuklah tempat utama perniagaan, suatu cawangan, agensi, tempat perniagaan bergerak, tempat perniagaan yang ditubuhkan dan disenggarakan bagi suatu tempoh yang terhad sahaja, terminal elektronik dan mana-mana tempat perniagaan lain;

“pendeposit” ertinya seseorang yang mempunyai sesuatu akaun di bank Islam sama ada akaun itu ialah suatu akaun semasa, suatu akaun simpanan, suatu akaun pelaburan atau sesuatu akaun deposit lain;

“perbadanan” mempunyai erti yang diberi kepadanya oleh Akta Syarikat 1965 [*Akta 125*];

“perniagaan perbankan Islam” ertinya perniagaan bank yang tujuan dan pengendaliannya tidak melibatkan apa-apa elemen yang tidak diluluskan oleh Agama Islam;

“perniagaan perbankan Islam antarabangsa” ertinya perniagaan bank Islam dalam mata wang selain ringgit atau apa-apa perniagaan bank Islam lain sebagaimana yang ditentukan oleh Bank Negara;

“subsidiari” mempunyai erti yang diberi kepadanya di bawah seksyen 5 Akta Syarikat 1965;

“syarikat” mempunyai erti yang diberi kepadanya oleh Akta Syarikat 1965;

“syarikat asing” mempunyai erti yang diberikan kepadanya oleh Akta Syarikat 1965;

“syarikat awam” mempunyai erti yang diberikan kepadanya oleh Akta Syarikat 1965;

“syer” ertinya syer dalam modal syer bagi sesuatu perbadanan dan termasuklah saham, kecuali jika sesuatu perbezaan antara saham dengan syer adalah dinyatakan atau difahamkan.

BAHAGIAN II

PELESENAN BANK ISLAM

Perniagaan perbankan Islam diuruskan hanya oleh sesuatu bank Islam berlesen

3. (1) Perniagaan perbankan Islam tidak boleh diuruskan di Malaysia melainkan oleh sesuatu syarikat yang memiliki suatu lesen secara bertulis daripada Menteri yang membenarkannya berbuat demikian.

(2) Sesuatu syarikat yang berkehendakkan kuasa untuk menjalankan perniagaan perbankan Islam di Malaysia hendaklah memohon secara bertulis kepada Menteri melalui Bank Negara bagi suatu lesen di bawah seksyen ini dan hendaklah mengemukakan—

- (a) suatu salinan memorandum persatuan dan artikel persatuan atau surat cara lain yang di bawahnya syarikat itu diperbadankan, ditentusahkan dengan sewajarnya melalui akuan berkanun yang dibuat oleh seorang pegawai kanan syarikat; dan
- (b) apa-apa dokumen atau maklumat lain yang diminta oleh Menteri.

(3) Apabila menerima sesuatu permohonan di bawah subseksyen (2) Bank Negara hendaklah menimbangkan permohonan itu dan membuat syor kepada Menteri yang menyatakan sama ada suatu lesen patut diberi atau tidak, dan syarat-syarat, jika ada, yang hendaklah dikenakan kepada lesen itu.

(4) Apabila menerima sesuatu permohonan di bawah subseksyen (2) dan syor Bank Negara di bawah subseksyen (3), Menteri boleh, tertakluk kepada seksyen 4, memberikan suatu lesen, dengan syarat atau tanpa syarat, atau enggan memberikan suatu lesen.

(5) Bank Negara tidak boleh mengesyorkan pemberian lesen, dan Menteri tidak boleh memberikan suatu lesen, melainkan jika Bank Negara atau Menteri, mengikut mana-mana yang berkenaan, berpuas hati—

(a) bahawa tujuan dan pengendalian perniagaan perbankan yang dia berhasrat menjalankan itu tidak akan melibatkan apa-apa elemen yang tidak diluluskan oleh Agama Islam; dan

(b) bahawa terdapat, dalam artikel persatuan bank yang berkenaan, peruntukan bagi penubuhan suatu badan penasihat Syariah, sebagaimana yang diluluskan oleh Bank Negara untuk menasihat bank mengenai pengendalian perniagaan perbankannya untuk menjamin ianya tidak melibatkan apa-apa elemen yang tidak diluluskan oleh Agama Islam.

(5A) Mana-mana bank Islam yang dilesenkan di bawah seksyen ini hendaklah disifatkan sebagai suatu institusi anggota di bawah Akta Perbadanan Insurans Deposit Malaysia 2005 [Akta 642].

(6) Mana-mana orang yang melanggar peruntukan seksyen ini melakukan suatu kesalahan dan boleh, apabila disabitkan, didenda tidak melebihi dua puluh ribu ringgit atau dipenjarakan selama tempoh tidak melebihi tiga tahun atau kedua-duanya.

Menteri boleh mengubah atau membatalkan syarat lesen

4. (1) Menteri boleh pada bila-bila masa, atas syor Bank Negara, mengubah atau membatalkan apa-apa syarat yang sedia ada bagi sesuatu lesen atau mengenakan syarat atau syarat tambahan.

(2) Menteri hendaklah, sebelum mengambil apa-apa tindakan di bawah subseksyen (1), memberitahu secara bertulis niatnya untuk mengambil tindakan itu kepada bank Islam yang berkenaan dan hendaklah memberi bank itu suatu peluang untuk mengemukakan dalam suatu tempoh, tidak kurang dari empat belas hari, sebagaimana yang dinyatakan dalam pemberitahuan itu sebab-sebab mengapa syarat lesen itu tidak patut diubah atau dibatalkan atau syarat atau syarat tambahan itu tidak patut dikenakan.

(3) Jika sesuatu lesen tertakluk kepada syarat-syarat, bank Islam itu hendaklah mematuhi syarat-syarat itu.

(4) Mana-mana bank Islam yang tidak mematuhi mana-mana syarat lesennya melakukan suatu kesalahan dan boleh, apabila disabitkan, didenda tidak melebihi dua puluh ribu ringgit.

Lesen tidak boleh diberi dalam hal tertentu

5. (1) Tiada syarikat boleh diberi sesuatu lesen di bawah seksyen 3 dan juga tiada syarikat yang diberi lesen di bawah seksyen itu boleh menjalankan perniagaan di Malaysia tanpa keizinan bertulis Menteri jika kumpulan wang modalnya yang tidak terjejas oleh kerugian atau selainnya adalah kurang daripada amaun minimum.

(2) Bagi maksud seksyen ini—

“amaun minimum” ertinya apa-apa amaun kumpulan wang modal yang hendaklah disenggarakan oleh bank Islam sebagaimana yang ditetapkan oleh Menteri atas syor Bank Negara melalui pemberitahuan dalam *Warta*;

“kumpulan wang modal” ertinya modal yang telah dibayar dan rizab dan apa-apa sumber modal lain sebagaimana ditakrifkan dan dikira mengikut apa-apa cara yang ditetapkan melalui notis secara bertulis dari semasa ke semasa oleh Bank Negara.

(3) Kedaluwarsa amaun minimum yang kena disenggarakan di bawah subseksyen (2) hendaklah dipatuhi dalam tempoh tangguhan yang sama iaitu tidak kurang dari tiga bulan sebagaimana yang dinyatakan dalam pemberitahuan itu.

6. (*Dipotong oleh Akta A1214*).

Pembukaan cawangan baru

7. Kecuali dengan keizinan secara bertulis dari Bank Negara, tiada sesuatu bank Islam boleh membuka sesuatu cawangan, agensi atau pejabat baru di mana-mana bahagian Malaysia atau di luar Malaysia.

Bank Islam boleh mengadakan pertalian perbankan koresponden dengan bank di luar Malaysia

8. (1) Tertakluk kepada subseksyen (2), tiap-tiap bank Islam boleh mengadakan pertalian perbankan koresponden dengan mana-mana bank di luar Malaysia.

(2) Bank Negara boleh menetapkan melalui notis secara bertulis bahawa tiada bank Islam boleh mengadakan, kecuali dengan kelulusan Menteri atas syor Bank Negara, pertalian perbankan koresponden dengan mana-mana bank yang ditubuhkan di mana-mana negara yang dinyatakan dalam pemberitahuan atau dengan mana-mana bank yang dipunyai atau dikawal oleh Kerajaan atau agensi Kerajaan bagi mana-mana negara itu.

Fi lesen

9. Tiap-tiap bank Islam hendaklah membayar kepada Bank Negara fi lesen tahunan yang ditetapkan oleh Menteri, atas syor Bank Negara, melalui pemberitahuan dalam *Warta*.

Sekatan terhadap penggunaan perkataan tertentu dalam nama bank Islam

10. Kecuali dengan keizinan secara bertulis Menteri, tiada sesuatu bank Islam boleh diberi lesen atas suatu nama yang termasuk mana-mana daripada perkataan “Kebangsaan”, “Komanwel”, “Malaysia”, “Malaysia” sebagai kata sifat, “Negara”, “Negeri”, “Persekutuan”, “Persekutuan” sebagai kata sifat atau “Rizab” sama ada dalam bahasa kebangsaan atau bahasa Inggeris atau dalam apa-apa bahasa lain.

Pembatalan lesen

11. (1) Tertakluk kepada subseksyen (2), jika mana-mana bank Islam—

- (a) menuju matlamat, atau menjalankan pengendalian, yang melibatkan apa-apa elemen yang tidak diluluskan oleh Agama Islam;
- (b) menjalankan perniagaannya dengan cara yang memudaratkan kepentingan pendepositnya dan pemiutang lain;
- (c) mempunyai aset yang tidak mencukupi untuk meliputi liabilitinya kepada awam;
- (d) melanggar mana-mana peruntukan Akta ini;
- (e) telah terhenti menjalankan perniagaan perbankan di Malaysia; atau
- (f) telah terhenti menjadi suatu institusi anggota di bawah Akta Perbadanan Insurans Deposit Malaysia 2005,

Menteri boleh, atas syor Bank Negara, membatalkan mana-mana lesen yang telah dikeluarkan kepada bank itu.

(2) Menteri hendaklah, sebelum pembatalan itu, memberitahu niat untuk mengambil tindakan itu kepada bank Islam yang berkenaan dan hendaklah memberi bank itu suatu peluang untuk mengemukakan dalam suatu tempoh, tidak kurang daripada dua puluh satu hari, sebagaimana yang dinyatakan dalam pemberitahuan itu sebab mengapa lesen itu tidak patut dibatalkan.

(3) Jika lesen sesuatu bank Islam telah dibatalkan di bawah subseksyen (1), bank itu boleh dalam tempoh tiga puluh hari dari pembatalan itu merayu terhadap pembatalan itu kepada Mahkamah Tinggi, yang boleh membuat apa-apa perintah mengenainya sebagaimana yang difikirkannya patut, termasuk apa-apa arahan tentang kos rayuan itu.

(4) Bank Negara berhak untuk didengari atas apa-apa rayuan itu.

(5) Pembuatan sesuatu rayuan di bawah seksyen ini tidak boleh dengan apa-apa cara menyentuh perjalanan kuasa dan kewajipan Bank Negara di bawah seksyen 37, 39 dan 40.

Kesan pembatalan lesen

12. (1) Jika sesuatu perintah pembatalan berkuat kuasa di bawah seksyen 11 —

- (a) notis pembatalan itu hendaklah disiarkan dalam *Warta*; dan
- (b) bank Islam itu hendaklah mulai dari tarikh notis itu terhenti menguruskan apa-apa perniagaan perbankan di Malaysia kecuali sebagaimana yang diluluskan oleh Menteri atas syor Bank Negara bagi maksud menggulung perniagaan perbankannya.

(2) Peruntukan perenggan (1)(b) tidak boleh menyentuh penguatkuasaan oleh mana-mana orang apa-apa hak atau tuntutan terhadap bank atau oleh bank mengenai apa-apa hak atau tuntutan terhadap mana-mana orang.

Penyiaran senarai bank Islam

13. Bank Negara hendaklah menyebabkan supaya disiarkan dalam *Warta* pada setiap tahun suatu senarai semua bank Islam yang telah dikeluarkan lesen kepadanya di bawah Akta ini, dan jika apa-apa lesen dikeluarkan, dibatalkan atau diserahkan balik dalam lat tempoh antara penyiaran dua senarai itu, notis mengenainya hendaklah juga dipastikan supaya disiarkan dalam *Warta*.

Nasihat Majlis Penasihat Syariah

13A. (1) Sesuatu bank Islam boleh mendapatkan nasihat Majlis Penasihat Syariah tentang perkara Syariah yang berhubungan dengan perniagaan perbankannya dan bank Islam itu hendaklah mematuhi nasihat Majlis Penasihat Syariah.

(2) Dalam seksyen ini, “Majlis Penasihat Syariah” ertinya Majlis Penasihat Syariah yang ditubuhkan di bawah subseksyen 16B(1) Akta Bank Negara Malaysia 1958.

BAHAGIAN III

KEHENDAK KEWANGAN DAN KEWAJIPAN BANK ISLAM

Penyenggaraan kumpulan wang modal

14. (1) Bank Negara boleh menghendaki sesuatu bank Islam supaya menyenggarakan kumpulan wang modal, yang tidak terjejas oleh kerugian atau selainnya, mengikut apa-apa kadar bagi aset cawangan dan pejabatnya di Malaysia dan di luar Malaysia atau hanya bagi cawangan dan pejabatnya di Malaysia sebagaimana yang ditetapkan dari semasa ke semasa oleh Bank Negara melalui notis secara bertulis.

(2) “Kumpulan wang modal” dalam subseksyen (1) hendaklah mempunyai erti yang diberi kepada ungkapan itu dalam subseksyen 5(2) tetapi dengan apa-apa ubah suaian yang dinyatakan dari semasa ke semasa bagi maksud subseksyen (1) oleh Bank Negara melalui notis secara bertulis.

Penyenggaraan kumpulan wang rizab

15. (1) Tiap-tiap bank Islam—

- (a) hendaklah menyenggarakan suatu kumpulan kumpulan wang rizab; dan
- (b) sebelum apa-apa dividen diisytiharkan hendaklah memindahkan kepada kumpulan wang rizab daripada untung bersih setiap tahun, selepas peruntukan yang sepatutnya dibuat untuk zakat atau cukai—
 - (i) selagi amaun kumpulan wang rizab itu kurang daripada lima puluh peratus daripada modal yang telah dibayar, sejumlah wang yang sama banyak dengan tidak kurang daripada lima puluh peratus daripada untung bersih itu;
 - (ii) selagi amaun kumpulan wang rizab itu lima puluh peratus tetapi kurang daripada seratus peratus daripada modal yang telah dibayar, sejumlah wang yang sama banyak dengan tidak kurang daripada dua puluh lima peratus daripada untung bersih itu.

(2) Jika Bank Negara berpuas hati bahawa agregat kumpulan wang rizab sesuatu bank Islam mencukupi untuk perniagaannya, ia boleh melalui perintah secara bertulis mengecualikan bank itu daripada peruntukan subseksyen (1) bagi tempoh satu tahun.

Peratusan aset cair

16. (1) Bank Negara boleh dari semasa ke semasa menetapkan melalui notis secara bertulis kepada setiap bank Islam suatu amaun atau amaun-amaun minimum aset cair yang hendaklah dipegang oleh bank itu pada setiap masa.

(2) Jumlah atau jumlah minimum aset yang ditetapkan untuk dipegang hendaklah dinyatakan dalam bentuk suatu peratusan yang aset itu hendaklah mengandungi deposit Islam setiap bank Islam.

(3) Bilamana Bank Negara mengeluarkan sesuatu notis di bawah subseksyen (1) setiap bank Islam hendaklah diberi tempoh tanggungan yang sama, tidak kurang daripada satu minggu, sebagaimana yang dinyatakan dalam notis itu untuk mematuhi peruntukannya.

(4) Sesuatu bank Islam tidak boleh, tanpa kelulusan Bank Negara, meminjamkan atau mendahulukan apa-apa wang kepada mana-mana orang dalam tempoh bank itu tidak mematuhi apa-apa notis di bawah subseksyen (1).

(5) Bagi maksud mengira amaun atau amaun-amaun aset cair di bawah seksyen ini dan deposit Islam bagi sesuatu bank Islam yang menjalankan perniagaan di Malaysia dan di tempat lain dan apa-apa liabiliti lain bank itu yang ditentukan oleh Bank Negara, pejabat dan cawangan bank itu di Malaysia hendaklah disifatkan menjadi suatu bank berasingan yang menjalankan perniagaan di Malaysia.

(6) Bagi maksud seksyen ini aset cair ialah—

- (a) wang kertas dan syiling yang sah diperlakukan di Malaysia;
- (b) baki di Bank Negara, tidak termasuk rizab yang dinyatakan dalam perenggan 37(1)(d) Akta Bank Negara Malaysia 1958;
- (c) sijil pelaburan yang dikeluarkan di bawah *Akta Pendanaan Kerajaan 1983 [*Akta 275*]; dan

*CATATAN — Sebelum ini disebut sebagai Akta Pelaburan Kerajaan 1983. Tajuk ringkas ditukar oleh seksyen 3 Akta Pelaburan Kerajaan (Pindaan) 2005 [*Akta A1242*] mula berkuat kuasa pada 17 Jun 2005.

(d) apa aset lain yang diluluskan oleh Menteri atas syor Bank Negara.

(7) Bank Negara boleh melalui notis secara bertulis menghendaki setiap bank Islam supaya memberikan apa-apa penyata atau penyata-penyata sebagaimana yang difikirkan perlu oleh Bank Negara untuk pelaksanaan seksyen ini.

(8) Mana-mana bank Islam yang tidak mematuhi mana-mana peruntukan seksyen ini boleh dikehendaki membayar, apabila diminta berbuat demikian oleh Bank Negara, suatu penalti sebanyak tidak lebih daripada satu persepuluh daripada satu peratus daripada amaun kekurangan bagi tiap-tiap hari kekurangan itu berterusan.

(9) Mana-mana bank Islam yang tidak atau enggan membayar sesuatu penalti di bawah subseksyen (8) melakukan suatu kesalahan di bawah Akta ini.

Juruaudit dan laporan juruaudit

17. (1) Walau apa pun peruntukan Akta Syarikat 1965, tiap-tiap bank Islam hendaklah melantik pada tiap-tiap tahun seorang juruaudit yang diluluskan oleh Menteri.

(2) Menteri atas syor Bank Negara boleh melantik seorang juruaudit—

(a) jika bank Islam itu tidak melantik seorang juruaudit; atau

(b) jika difikirkannya wajar supaya seorang lagi juruaudit bertindak bersama-sama dengan juruaudit yang dilantik di bawah subseksyen (1),

dan boleh menetapkan saraan yang kena dibayar oleh bank Islam itu kepada juruaudit itu.

(3) Kewajipan juruaudit yang dilantik di bawah subseksyen (1) dan (2) bagi bank Islam itu ialah—

(a) untuk menjalankan bagi tahun yang dia dilantik pengauditan akaun bank itu; dan

(b) membuat suatu laporan mengikut seksyen 174 Akta Syarikat 1965 berkenaan dengan kunci kira-kira dan akaun untung dan rugi tahunan bank itu.

(4) Laporan juruaudit yang tersebut dalam perenggan 3(b) hendaklah dibentangkan bersama dengan laporan pengarah bank Islam itu di mesyuarat agung tahunan bank itu; dan suatu akuan berkanun yang dibuat oleh pegawai kanan bank itu yang bermaksud bahawa laporan itu telah dibentangkan sedemikian hendaklah menyertai dokumen yang dihantarkan di bawah perenggan 18(1)(c).

(5) Tiada seorang yang mempunyai sesuatu kepentingan dalam sesuatu bank Islam selain sebagai seorang pemegang syer, dan tiada pengarah atau pegawai bank itu layak dilantik sebagai juruaudit bagi bank itu; dan mana-mana orang yang dilantik sebagai juruaudit bagi sesuatu bank Islam yang selepas perlantikan itu memperoleh apa-apa kepentingan atau menjadi seorang pengarah atau seorang pegawai bank itu hendaklah serta-merta berhenti menjadi juruaudit.

(6) Kewajipan, kuasa dan liabiliti yang dikenakan dan diberikan oleh seksyen 33 berhubung dengan sesuatu penyiasatan oleh Bank Negara mengenai hal ehwal sesuatu bank Islam di bawah seksyen 31 atau 32 dengan ini dikenakan dan diberikan berhubung dengan juruaudit yang dilantik di bawah seksyen ini.

(7) Mana-mana bank Islam yang tidak mematuhi kehendak subseksyen (4) melakukan suatu kesalahan dan boleh, apabila disabitkan, didenda tidak melebihi dua puluh ribu ringgit.

Kunci kira-kira yang diaudit

18. (1) Tiap-tiap bank Islam hendaklah—

(a) mempamerkan di suatu tempat yang mudah dilihat di tiap-tiap pejabat atau tempat perniagaan di Malaysia—

(i) satu salinan bagi setiap satu kunci kira-kira, akaun untung dan rugi tahunannya yang telah diaudit akhir sekali, bersama dengan apa-apa catatan mengenainya, dan laporan juruaudit;

- (ii) nama penuh semua pengarahnya; dan
 - (iii) nama semua subsidiari bagi bank itu pada masa itu;
- (b) menyiarkan dalam masa empat belas hari selepas dibentangkan akaunnya di mesyuarat agung tahunannya dalam sekurang-kurangnya dua akhbar harian yang disiarkan di Malaysia dan diluluskan oleh Bank Negara, satu salinan bagi setiap kunci kira-kira, akaun untung dan rugi tahunannya yang telah diaudit akhir sekali, bersama dengan apa-apa catatan mengenainya, dan laporan juruaudit; dan
- (c) dalam masa enam bulan selepas ditutup setiap tahun kewangan atau apa-apa tempoh selanjutnya sebagaimana yang diluluskan oleh Bank Negara, menghantar kepada Bank Negara—
- (i) dua salinan setiap satu kunci kira-kira, akaun untung dan rugi tahunannya yang telah diaudit akhir sekali, bersama dengan apa-apa catatan mengenainya, dan laporan juruaudit dan pengarah;
 - (ii) mengenai sesuatu bank Islam dengan cawangan di luar Malaysia, dua salinan bagi setiap satu kunci kira-kira dan akaun untung dan rugi tahunannya yang telah diaudit akhir sekali berkenaan dengan pengendaliannya di Malaysia, dan dua salinan bagi setiap kunci kira-kira dan akaun untung dan rugi tahunannya yang telah diaudit akhir sekali berkenaan dengan pengendaliannya dalam setiap negeri di luar Malaysia.
- (2) Bentuk dan kandungan kunci kira-kira dan akaun untung dan rugi, bersama dengan laporan pengarah, hendaklah sebagaimana diluluskan oleh Bank Negara.
- (3) Bank Negara boleh menghendaki mana-mana bank Islam mengemukakan apa-apa maklumat lanjut atau tambahan sebagaimana yang difikirkannya perlu sama ada secara penjelasan, penghuraian atau selainnya berkenaan dengan kunci kira-kira dan akaun untung dan rugi yang dihantar oleh bank itu di bawah perenggan 1(c) dan maklumat itu hendaklah dikemukakan dalam apa-apa tempoh dan mengikut apa-apa cara sebagaimana yang dikehendaki oleh Bank Negara.

(4) Mana-mana bank Islam yang tidak mematuhi peruntukan seksyen ini melakukan suatu kesalahan dan boleh, apabila disabitkan, didenda tidak melebihi dua puluh ribu ringgit.

Statistik hendaklah diberikan

19. (1) Tiap-tiap bank Islam hendaklah menghantar kepada Bank Negara mengikut apa-apa bentuk sebagaimana yang ditetapkan oleh Bank Negara—

- (a) suatu penyata yang menunjukkan liabiliti dan aset bagi pejabat dan cawangan perbankannya di Malaysia pada penutupan perniagaan pada hari perniagaan akhir bagi setiap bulan dalam apa-apa tempoh sebagaimana yang ditetapkan melalui notis secara bertulis dari semasa ke semasa oleh Bank Negara;
- (b) suatu penyata yang memberikan suatu analisis mengenai pinjaman, pendahuluan dan pelaburan bagi pejabat dan cawangan perbankannya di Malaysia seperti pada apa-apa lat tempoh dan dalam apa-apa tempoh sebagaimana yang ditetapkan melalui notis dari semasa ke semasa oleh Bank Negara;
- (c) tidak lewat daripada enam bulan selepas ditutup tahun kewangannya, suatu penyata yang menunjukkan pendapatan dan perbelanjaan berkenaan dengan perniagaannya di Malaysia;
- (d) walau apa pun peruntukan subseksyen 34(3), suatu penyata yang menunjukkan maklumat kredit pelanggannya sebagaimana yang dikehendaki bagi maksud biro kredit yang ditubuhkan di bawah perenggan 30(1) (*mmm*) Akta Bank Negara Malaysia 1958 pada apa-apa lat tempoh dan dalam apa-apa tempoh sebagaimana yang ditetapkan melalui notis secara bertulis dari semasa ke semasa oleh Bank Negara;
- (da) (*Dipotong oleh Akta A1145*).
- (e) apa-apa maklumat statistik sebagaimana yang diminta oleh Bank Negara.

(2) Kecuali bagi maksud perenggan (1)(d), apa-apa maklumat yang diterima daripada sesuatu bank di bawah seksyen ini hendaklah disifatkan sebagai rahsia antara bank itu dengan Bank Negara.

(3) Mana-mana bank Islam yang tidak mematuhi mana-mana kehendak yang dinyatakan dalam subseksyen (1) melakukan suatu kesalahan dan boleh, apabila disabitkan, didenda tidak melebihi empat ribu ringgit bagi tiap-tiap hari keingkaran itu berterusan.

(4) Adalah menjadi tanggungjawab Bank Negara untuk menyediakan dan menyiarkan penyata yang disatukan mengagregatkan angka dalam penyata yang diberi di bawah perenggan 1(a) dan (b).

Maklumat mengenai cawangan di negara asing

20. Sesuatu bank Islam yang mengendalikan pejabat cawangan atau agensi di luar Malaysia hendaklah memberi Bank Negara apa-apa maklumat yang berhubungan dengan pengendalian pejabat atau agensi itu sebagaimana yang diminta oleh Bank Negara.

BAHAGIAN IV

PEMUNYAAN, PENGAWALAN DAN PENGURUSAN BANK ISLAM

Maklumat mengenai perubahan kawalan bank Islam

21. (1) Bilamana sesuatu perubahan hampir berlaku dalam pengawalan mana-mana bank Islam, bank itu hendaklah melaporkan perubahan yang dicadangkan itu kepada Bank Negara.

(2) Bilamana sesuatu pinjaman atau pendahuluan dibuat oleh mana-mana bank Islam yang agregatnya dijamin dengan dua puluh peratus atau lebih daripada syer modal yang telah dibayar bagi mana-mana bank Islam lain atau mana-mana bank berlesen di bawah *Akta Bank dan Institusi-Institusi Kewangan 1989 [Akta 372] yang diperbadankan di Malaysia atau bagi mana-mana syarikat kewangan yang dilesen di bawah **Akta Bank dan Institusi-Institusi Kewangan 1989, bank Islam hendaklah melaporkan fakta itu kepada Bank Negara.

*CATATAN—Sebelum ini, Akta Bank 1973 [Akta 102]. Akta Bank dan Institusi-Institusi Kewangan 1989 [Akta 372] telah menggantikan Akta Bank 1973 mula berkuat kuasa pada 1 Oktober 1989 kecuali institusi-institusi terjadual dan mula berkuat kuasa pada 1 Januari 1990 bagi institusi-institusi terjadual—lihat subseksyen 128(1) Akta 372 dan P.U. (B) 490/1990.

**CATATAN—Sebelum ini, Akta Syarikat Kewangan 1969 [Akta 6]. Akta Bank dan Institusi-Institusi Kewangan 1989 [Akta 372] telah menggantikan Akta Syarikat Kewangan 1969 mula berkuat kuasa pada 1 Oktober 1989 kecuali institusi-institusi terjadual dan mula berkuat kuasa pada 1 Januari 1990 bagi institusi-institusi terjadual—lihat subseksyen 128(1) Akta 372 dan P.U. (B) 490/1990.

(3) Laporan yang dikehendaki dibuat di bawah subseksyen (2) hendaklah mengandungi yang berikut—

- (i) nama dan alamat peminjam;
- (ii) nama bank Islam, bank berlesen atau syarikat kewangan yang mengeluarkan syer yang dengannya pinjaman atau pendahuluan itu dicagarkan;
- (iii) bilangan syer yang dengannya pinjaman atau pendahuluan itu dicagarkan; dan
- (iv) amaun pinjaman atau pendahuluan.

(4) Laporan di bawah subseksyen (1) dan (2) hendaklah menjadi tambahan kepada apa-apa laporan yang mungkin dikehendaki menurut peruntukan mana-mana undang-undang bertulis yang lain.

(5) Bagi maksud seksyen ini, ungkapan “pengawasan” berhubung dengan sesuatu bank Islam ertinya pemilikan secara langsung atau secara tidak langsung kuasa untuk mengarahkan atau memastikan pengarahannya dan dasar bank itu.

(6) Mana-mana bank Islam yang tidak mematuhi peruntukan subseksyen (1) atau (2) melakukan suatu kesalahan dan boleh, apabila disabitkan, didenda tidak melebihi dua puluh ribu ringgit.

Sanksi dikehendaki untuk membina semula, dsb., bank

22. (1) Tiap-tiap bank Islam hendaklah memperoleh kelulusan Menteri mengenai apa-apa—

(a) perkiraan atau perjanjian yang dicadangkan—

- (i) untuk menjual atau melupuskan syer-syer atau perniagaannya; atau
- (ii) mengenai kuasa mengundi, pengurusan atau perkara lain,

yang akan mengakibatkan sesuatu perubahan dalam pengawasan atau pengurusan bank itu; dan

(b) skim yang dicadangkan—

- (i) bagi membina semula bank itu; atau
- (ii) bagi menyatukan, mencantumkan atau selainnya antara bank itu dan mana-mana perbadanan lain,

dalam mana kesemua atau mana-mana bahagian daripada pengusahaan atau harta bank itu akan dipindah milik kepada suatu perbadanan lain.

(2) Menteri, atas syor Bank Negara, boleh meluluskan atau enggan membenarkan perkiraan, perjanjian atau skim yang dicadangkan itu, tetapi kelulusan Menteri itu tidak boleh ditahan dengan tidak munasabah.

(3) Subseksyen (1) tidak terpakai bagi mana-mana perkiraan, perjanjian atau skim yang dijalankan oleh mana-mana bank Islam di bawah Akta Perbadanan Insurans Deposit Malaysia 2005.

Kehilangan kelayakan pengarah dan pekerja bank

23. (1) Tanpa menyentuh apa-apa jua yang terkandung dalam Akta Syarikat 1965, mana-mana orang yang menjadi pengarah, pengurus, setiausaha atau pegawai lain yang bersangkutan paut dengan pengurusan sesuatu bank Islam hendaklah terhenti memegang jawatan—

- (a) jika dia menjadi bankrap, menggantung pembayaran atau mengkompaun dengan pemiutangnya; atau
- (b) jika dia disabitkan atas sesuatu kesalahan yang melibatkan kecurangan atau fraud.

(2) Tiada seorang pun yang telah menjadi seorang pengarah bagi, atau secara langsung bersangkutan paut dengan pengurusan, sesuatu bank Islam atau bank berlesen di bawah *Akta Bank dan Institusi-Institusi Kewangan 1989 yang telah digulung oleh sesuatu mahkamah boleh, tanpa kebenaran nyata daripada Menteri, bertindak atau terus bertindak sebagai seorang pengarah, atau secara langsung bersangkutan paut dengan pengurusan, mana-mana bank Islam.

(3) Mana-mana orang yang bertindak dengan melanggar subseksyen (1) atau (2) melakukan suatu kesalahan dan boleh, apabila disabitkan, didenda tidak melebihi dua puluh ribu ringgit atau dipenjarakan selama tempoh tidak melebihi tiga tahun atau kedua-duanya.

*CATATAN — Akta ini telah menggantikan Akta Bank 1973 [*Akta 102*] mula berkuat kuasa pada 1 Oktober 1989 kecuali institusi-institusi terjadual dan mula berkuat kuasa pada 1 Januari 1990 bagi institusi-institusi terjadual—lihat subseksyen 128(1) Akta 372 dan P.U. (B) 490/1990.

BAHAGIAN V

SEKATAN MENGENAI PERNIAGAAN

Sekatan mengenai pembayaran dividen dan pemberian pendahuluan dan pinjaman

24. (1) Tiada bank Islam boleh—

- (a) membayar apa-apa dividen atas syernya sehingga semua perbelanjaannya yang dipermodalkan (termasuk belanja permulaan, belanja penubuhan, komisen menjual syer, bayaran broker, amaun kerugian yang ditanggung dan apa-apa butiran perbelanjaan lain yang tidak berupa aset ketara) telah dihapuskan dengan sepenuhnya;
- (b) memberi sesuatu pendahuluan, pinjaman atau kemudahan kredit dengan cagaran syernya sendiri; atau
- (c) memberi pendahuluan tidak bercagar, pinjaman tidak bercagar atau kemudahan kredit tidak bercagar lebih daripada sepuluh ribu ringgit pada agregatnya dan belum dijelaskan pada mana-mana satu masa kepada mana-mana perbadanan yang disifatkan sebagai berkaitan dengan bank itu sebagaimana diperihalkan dalam seksyen 6 Akta Syarikat 1965, selain sesuatu bank Islam, sesuatu bank berlesen di bawah *Akta Bank dan Institusi-Institusi Kewangan 1989, sesuatu syarikat kewangan yang dilesenkan di bawah **Akta Bank dan Institusi-Institusi Kewangan 1989, atau mana-mana institusi kewangan lain yang diluluskan oleh Bank Negara.

(2) Bagi maksud seksyen ini “pendahuluan tidak bercagar”, “pinjaman tidak bercagar” dan “kemudahan kredit tidak bercagar” masing-masing ertinya pendahuluan, pinjaman dan kemudahan kredit yang diberikan tanpa cagaran, atau, berkenaan dengan apa-apa pendahuluan, pinjaman dan kemudahan kredit yang diberikan dengan cagaran, mana-mana bahagiannya yang pada bila-bila masa lebih daripada nilai pasaran bagi aset yang menjadi cagaran itu atau, jika Bank Negara berpuas hati bahawa tiada sesuatu nilai pasaran yang tertentu, nilai yang dibuat atas asas sesuatu penilaian yang diluluskan oleh Bank Negara.

*CATATAN—Sebelum ini, Akta Bank 1973 [Akta 102]. Akta Bank dan Institusi-Institusi Kewangan 1989 [Akta 372] telah menggantikan Akta Bank 1973 mula berkuat kuasa pada 1 Oktober 1989 kecuali institusi-institusi terjadual dan mula berkuat kuasa pada 1 Januari 1990 bagi institusi-institusi terjadual—lihat subseksyen 128(1) Akta 372 dan P.U. (B) 490/1990.

**CATATAN—Sebelum ini, Akta Syarikat Kewangan 1969 [Akta 6]. Akta Bank dan Institusi-Institusi Kewangan 1989 [Akta 372] telah menggantikan Akta Syarikat Kewangan 1969 mula berkuat kuasa pada 1 Oktober 1989 kecuali institusi-institusi terjadual dan mula berkuat kuasa pada 1 Januari 1990 bagi institusi-institusi terjadual—lihat subseksyen 128(1) Akta 372 dan P.U. (B) 490/1990.

Larangan mengenai pemberian pinjaman, dsb., kepada pengarah, pegawai dan pekerja

25. (1) Melainkan jika dikecualikan selainnya oleh Bank Negara dengan atau tanpa syarat, atau kecuali sebagaimana yang diperuntukkan di bawah subseksyen (2) atau subseksyen (4) seksyen ini, tiada bank Islam boleh memberi pendahuluan, pinjaman atau kemudahan kredit kepada—

- (a) mana-mana pengarah, pegawai atau pekerjanya atau orang lain iaitu orang yang menerima saraan daripada bank Islam itu (selain daripada akauntan, peguam bela dan peguam cara, arkitek, ejen hartanah, doktor dan mana-mana orang lain yang menerima saraan daripada bank itu berkenaan dengan perkhidmatan profesional mereka);
- (b) mana-mana firma yang dalamnya mana-mana pengarah, pegawai atau pekerjanya mempunyai kepentingan sebagai pekongsi, pengurus, ejen atau penjamin;
- (c) mana-mana perbadanan yang dalamnya mana-mana pegawai atau pekerjanya ialah seorang pengarah, pengurus, ejen atau penjamin, atau mana-mana perbadanan yang mana-mana pegawai atau pekerjanya mempunyai apa-apa kepentingan material sebagaimana yang diputuskan oleh Bank Negara dalam syernya;
- (d) mana-mana perbadanan yang dalamnya mana-mana pengarahnya (yang bukannya seorang pengarah eksekutif, dia sebagai termasuk dalam lingkungan peruntukan perenggan (c) menurut subseksyen (3)) ialah seorang anggota, pengarah, pengurus, ejen atau penjamin, atau mana-mana perbadanan yang mana-mana pengarah bank Islam itu mempunyai apa-apa kepentingan dalam syernya sama ada secara langsung atau secara tidak langsung; atau
- (e) mana-mana individu yang mana-mana daripada pengarah, pegawai atau pekerjanya ialah seorang penjamin.

(2) Sesuatu bank Islam boleh memberi pinjaman kepada mana-mana pegawai atau pekerjanya yang diperuntukkan di bawah skim perkhidmatannya yang berkenaan dan, jika bank berpuas hati bahawa terdapatnya hal keadaan khas atau belas kasihan boleh memberi pinjaman yang tidak melebihi pada sesuatu masa enam bulan saraan pegawai atau pekerja itu atas apa-apa terma dan syarat yang difikirkan patut oleh bank.

(3) Peruntukan perenggan 1(c) dan subseksyen (2) juga terpakai bagi pengarah eksekutif bank Islam.

(4) Peruntukan perenggan 1(d) tidak terpakai bagi pemberian pendahuluan, pinjaman atau kemudahan kredit oleh sesuatu bank Islam kepada—

- (a) perbadanan yang disenaraikan di bursa saham yang diakui dan yang mana pengarah bank Islam itu tidak mempunyai kepentingan material sebagaimana yang diputuskan oleh Bank Negara dalam syer perbadanan sama ada secara langsung atau secara tidak langsung; dan
- (b) syarikat awam yang dalamnya pengarah bank Islam itu tidak mempunyai apa-apa kepentingan atas sifat peribadinya sebagaimana yang diputuskan oleh Bank Negara:

Dengan syarat bahawa bagi maksud subseksyen ini pengarah yang berkenaan bukanlah seorang pengarah eksekutif bank Islam itu.

(5) Bagi maksud seksyen ini, “pengarah”, “pegawai” atau “pekerja” termasuklah suami atau isteri, ibu atau bapa atau anak seseorang pengarah, pegawai atau pekerja.

Sekatan mengenai pemberian pinjaman, pendahuluan atau kemudahan kredit di bawah subseksyen 25(4)

26. Tiada bank Islam boleh memberi apa-apa pendahuluan, pinjaman atau kemudahan kredit di bawah pengecualian yang disebutkan dalam subseksyen 25(4) melainkan jika syarat yang berikut dipenuhi:

- (a) bahawa pendahuluan, pinjaman atau kemudahan kredit itu memenuhi standard kepercayaan kredit yang dikehendaki daripada peminjam lain yang memohon;
- (b) bahawa terma pendahuluan, pinjaman atau kemudahan kredit tidak kurang baiknya kepada bank itu daripada yang ditawarkan kepada orang lain;
- (c) bahawa pemberian pendahuluan, pinjaman atau kemudahan kredit itu akan memberi manfaat yang paling baik kepada bank itu; dan
- (d) bahawa pendahuluan, pinjaman atau kemudahan kredit itu telah diluluskan dengan undi tidak kurang daripada dua pertiga daripada semua pengarah lain bank itu dalam

mesyuarat lembaga penuh pengarah yang diadakan dengan sempurna dan kelulusan itu telah direkodkan dalam minit mesyuarat itu.

Sekatan kredit kepada seorang pelanggan

27. (1) Tiada sesuatu bank Islam boleh memberi kepada mana-mana pelanggan apa-apa kemudahan kredit atau menanggung apa-apa liabiliti lain bagi pihak pelanggan sebanyak amaun agregat yang melebihi apa-apa peratusan sebagaimana yang ditentukan dari semasa ke semasa oleh Bank Negara berhubung dengan kumpulan wang modal bank itu yang tidak terjejas oleh kerugian atau selainnya.

(2) Subseksyen (1) tidak terpakai bagi—

- (a) transaksi dengan bank Islam lain, dengan bank berlesen di bawah *Akta Bank dan Institusi-Institusi Kewangan 1989 dan dengan syarikat kewangan yang dilesenkan di bawah **Akta Bank dan Institusi-Institusi Kewangan 1989;
- (b) apa-apa kemudahan yang diberi berkenaan dengan import ke dalam Malaysia atau eksport ke luar Malaysia atau perdagangan di dalam Malaysia berasaskan surat kredit atau bil pertukaran; atau
- (c) apa-apa transaksi lain yang diluluskan oleh Bank Negara dari semasa ke semasa.

(3) Bagi maksud subseksyen (1) ungkapan “kumpulan wang modal” hendaklah mempunyai erti yang diberikan kepadanya oleh subseksyen 5(2).

Pengawalan had kredit

27A. (1) Seseorang pengarah, pengurus atau pekerja sesuatu bank Islam tidak boleh memberi apa-apa pendahuluan, pinjaman atau kemudahan kredit yang melebihi had kuasanya atau berlawanan dengan mana-mana arahan yang dikenakan oleh bank Islam itu.

*CATATAN—Sebelum ini, Akta Bank 1973 [*Akta 102*]. Akta Bank dan Institusi-Institusi Kewangan 1989 [*Akta 372*] telah menggantikan Akta Bank 1973 mula berkuat kuasa pada 1 Oktober 1989 kecuali institusi-institusi terjadual dan mula berkuat kuasa pada 1 Januari 1990 bagi institusi-institusi terjadual—lihat subseksyen 128(1) Akta 372 dan P.U. (B) 490/1990.

**CATATAN—Sebelum ini, Akta Syarikat Kewangan 1969 [*Akta 6*]. Akta Bank dan Institusi-Institusi Kewangan 1989 [*Akta 372*] telah menggantikan Akta Syarikat Kewangan 1969 mula berkuat kuasa pada 1 Oktober 1989 kecuali institusi-institusi terjadual dan mula berkuat kuasa pada 1 Januari 1990 bagi institusi-institusi terjadual—lihat subseksyen 128(1) Akta 372 dan P.U. (B) 490/1990.

(2) Bagi maksud seksyen ini, Menteri melalui notis bertulis boleh mengarahkan sesuatu bank Islam supaya mengemukakan apa-apa maklumat yang berhubungan dengan polisi dan tatacaranya mengenai pemberian apa-apa pendahuluan, pinjaman atau kemudahan kredit, khususnya had kuasa seseorang pengarah, pengurus atau pekerja bank Islam itu, atau apa-apa perubahan mengenainya dari semasa ke semasa:

Dengan syarat bahawa Menteri hendaklah mempunyai kuasa bagi mengarahkan sesuatu bank Islam supaya meminda tatacara yang diikuti oleh bank Islam itu dalam memberikan apa-apa pendahuluan, pinjaman atau kemudahan kredit termasuk had kuasa berkenaan dengan pemberian itu.

(3) Mana-mana orang yang melanggar apa-apa peruntukan seksyen ini atau apa-apa arahan yang dikeluarkan di bawah seksyen ini melakukan suatu kesalahan dan boleh, apabila disabitkan, didenda tidak melebihi daripada dua puluh ribu ringgit atau dipenjarakan selama tempoh tidak melebihi tiga tahun atau kedua-duanya.

Penzahiran kepentingan oleh pengarah

28. (1) Tiap-tiap pengarah sesuatu bank Islam yang dengan apa-apa cara jua pun, sama ada secara langsung atau secara tidak langsung, mempunyai kepentingan dalam sesuatu pendahuluan, pinjaman atau kemudahan kredit atau sesuatu pendahuluan, pinjaman atau kemudahan kredit yang dicadangkan daripada bank Islam itu hendaklah dengan seberapa segera yang praktik mengisytiharkan jenis kepentingannya kepada lembaga pengarah bank Islam itu dan setiausaha bank Islam itu hendaklah menyebabkan supaya pengisytiharan itu diedarkan serta-merta kepada semua pengarah.

(2) Kehendak subseksyen (1) tidak terpakai dalam apa-apa hal jika kepentingan pengarah itu terdiri hanya daripada menjadi seorang anggota atau pemiutang sesuatu perbadanan, yang mempunyai kepentingan dalam sesuatu pendahuluan, pinjaman atau kemudahan kredit atau pendahuluan, pinjaman atau kemudahan kredit yang dicadangkan daripada bank Islam itu jika kepentingan pengarah itu boleh dengan sewajarnya dianggap sebagai bukan sesuatu kepentingan material.

(3) Bagi maksud subseksyen (1), suatu notis am yang diberikan kepada lembaga pengarah sesuatu bank Islam oleh seseorang pengarah yang bermaksud bahawa dia merupakan seorang pegawai atau anggota sesuatu firma tertentu atau seorang anggota sesuatu perbadanan tertentu dan dia hendaklah dianggap sebagai mempunyai kepentingan dalam sesuatu pendahuluan, pinjaman atau kemudahan kredit yang mungkin, selepas tarikh notis itu, diberikan kepada firma atau perbadanan itu hendaklah disifatkan sebagai suatu pengisytiharan kepentingan yang cukup berhubung dengan mana-mana pendahuluan, pinjaman atau kemudahan kredit yang sedemikian diberi jika—

- (a) notis itu menyatakan jenis dan takat kepentingannya di dalam sesuatu firma atau perbadanan tertentu;
- (b) kepentingannya tidaklah berlainan jenisnya atau lebih besar takatnya daripada jenis dan takat yang dinyatakan sedemikian dalam notis itu pada masa apa-apa pendahuluan, pinjaman atau kemudahan kredit diberi; dan
- (c) notis itu diberikan pada mesyuarat pengarah atau pengarah itu mengambil langkah yang munasabah untuk memastikan supaya ia dikemukakan dan dibaca pada mesyuarat pengarah yang berikutnya selepas ia diberikan.

(4) Tiap-tiap pengarah sesuatu bank Islam yang memegang apa-apa jawatan atau memiliki apa-apa harta yang dengan mana sama ada secara langsung atau secara tidak langsung kewajipan atau kepentingan mungkin diwujudkan yang bercanggah dengan kewajipan atau kepentingannya sebagai pengarah hendaklah mengisytiharkan pada mesyuarat pengarah bank Islam itu fakta dan keadaan, jenis dan takat percanggahan itu.

(5) Pengisytiharan yang disebut dalam subseksyen (4) hendaklah dibuat pada mesyuarat pertama pengarah yang diadakan—

- (a) selepas dia menjadi seorang pengarah bank Islam itu; atau
- (b) (jika dia memang pengarah) selepas dia mula memegang jawatan atau memiliki harta, mengikut mana yang dikehendaki.

(6) Setiausaha bank Islam itu hendaklah menyebabkan supaya dikemukakan dan dibaca apa-apa pengisytiharan yang dibuat di bawah subseksyen (1) atau (4) pada mesyuarat pengarah yang

berikut selepas ianya diberikan, dan hendaklah merekodkan apa-apa pengisytiharan yang dibuat di bawah seksyen ini dalam minit mesyuarat yang perisytiharan itu dibuat atau di mana ianya telah dikemukakan dan dibaca.

(7) Mana-mana pengarah yang bertindak dengan melanggar subseksyen (1) atau (4) melakukan suatu kesalahan dan boleh, apabila disabitkan, didenda tidak melebihi dua puluh ribu ringgit atau dipenjarakan selama tempoh tidak melebihi tiga tahun atau kedua-duanya.

Pengehadan mengenai kemudahan kredit bagi maksud membiayai pembelian atau pemegangan syer

29. (1) Apa-apa kemudahan kredit yang diberikan oleh mana-mana bank Islam kepada mana-mana orang bagi maksud membiayai pembelian atau pemegangan syer tidak boleh melebihi apa-apa peratusan nilai pasaran bagi syer itu pada masa kemudahan kredit itu diberikan, sebagaimana yang diarahkan oleh Bank Negara secara bertulis.

(2) Sesuatu kemudahan kredit yang diberikan di bawah seksyen ini kepada mana-mana orang hendaklah diterangkan dalam suatu akaun yang berasingan daripada yang disimpan bagi apa-apa kemudahan kredit lain yang diberikan kepadanya.

(3) Bank Negara boleh memberi arahan secara bertulis kepada mana-mana bank Islam berkenaan dengan hal yang berikut, iaitu:

- (a) asas dan cara bagi menentukan nilai pasaran syer yang dipegang sebagai cagaran bagi kemudahan kredit itu;
- (b) pengeluaran kumpulan wang atau syer oleh orang yang kepadanya kemudahan kredit itu telah diberikan;
- (c) penggantian syer yang dipegang dengan syer lain sebagai cagaran bagi kemudahan kredit lain itu; dan
- (d) apa-apa perkara lain sebagaimana yang difikirkan perlu.

(4) Mana-mana bank Islam yang bertindak dengan melanggar peruntukan seksyen ini atau apa-apa arahan yang diberikan di bawah seksyen ini melakukan suatu kesalahan di bawah Akta ini.

Bukti mengenai pematuhan seksyen 24, 25, 26, 27 dan 29

30. Mana-mana bank Islam, jika pada bila-bila masa diminta secara bertulis oleh Bank Negara untuk berbuat demikian, hendaklah memenuhinya dengan pengemukaan apa-apa keterangan atau maklumat sebagaimana yang dikehendakinya bahawa bank itu tidak bertindak dengan melanggar mana-mana peruntukan seksyen 24, 25, 26, 27 dan 29.

BAHAGIAN VA

PERNIAGAAN PERBANKAN ISLAM ANTARABANGSA

Larangan menjalankan perniagaan perbankan Islam antarabangsa

30A. (1) Tiada seorang pun boleh menjalankan perniagaan perbankan Islam antarabangsa melainkan jika ia merupakan—

- (a) suatu bank Islam; atau
- (b) suatu syarikat atau institusi asing dan memegang lesen yang sah di bawah seksyen 30B untuk menjalankan perniagaan sedemikian.

(2) Mana-mana orang yang melanggar peruntukan seksyen ini melakukan suatu kesalahan dan boleh, apabila disabitkan, didenda tidak melebihi dua puluh ribu ringgit atau dipenjarakan selama tempoh tidak melebihi tiga tahun atau kedua-duanya.

Permohonan bagi lesen untuk menjalankan perniagaan perbankan Islam antarabangsa oleh orang selain bank Islam berlesen

30B. (1) Suatu syarikat atau institusi asing selain suatu bank Islam berlesen yang menghendakkan kuasa untuk menjalankan perniagaan perbankan Islam antarabangsa di Malaysia hendaklah memohon secara bertulis kepada Menteri melalui Bank Negara bagi suatu lesen di bawah Bahagian ini dan hendaklah mengemukakan—

- (a) suatu salinan memorandum persatuan dan artikel persatuan atau surat cara lain yang di bawahnya syarikat atau institusi asing itu, mengikut mana-mana yang berkenaan, diperbadankan, yang ditentukan dengan sewajarnya

melalui akuan berkanun yang dibuat oleh pegawai kanan syarikat atau institusi asing itu, mengikut mana-mana yang berkenaan; dan

(b) apa-apa dokumen atau maklumat lain yang diperlukan oleh Bank Negara atau Menteri, mengikut mana-mana yang berkenaan.

(2) Apabila menerima suatu permohonan di bawah subseksyen (1) Bank Negara hendaklah menimbangkan permohonan itu dan membuat syor kepada Menteri menyatakan sama ada suatu lesen hendaklah diberikan atau tidak, dan syarat-syarat, jika ada, yang hendak dikenakan kepada lesen itu.

(3) Apabila menerima suatu permohonan di bawah subseksyen (1) dan syor Bank Negara di bawah subseksyen (2), Menteri boleh, tertakluk kepada seksyen 30c, memberikan suatu lesen, dengan atau tanpa syarat, atau enggan memberikan suatu lesen.

(4) Bank Negara tidak boleh mengesyorkan pemberian lesen dan Menteri tidak boleh memberikan suatu lesen, melainkan jika Bank Negara atau Menteri, mengikut mana-mana yang berkenaan, berpuas hati bahawa tujuan dan pengendalian perniagaan perbankan yang hendak dijalankan itu tidak melibatkan apa-apa unsur yang tidak diluluskan oleh Agama Islam.

Menteri boleh mengubah atau membatalkan syarat lesen yang diberikan di bawah Bahagian ini

30c. (1) Menteri boleh pada bila-bila masa, atas syor Bank Negara, mengubah atau membatalkan apa-apa syarat yang sedia ada bagi sesuatu lesen atau mengenakan syarat atau syarat tambahan.

(2) Menteri hendaklah, sebelum mengambil apa-apa tindakan di bawah subseksyen (1), memberitahu secara bertulis tentang niatnya hendak mengambil tindakan sedemikian ke atas bank Islam antarabangsa yang berkenaan dan hendaklah memberi bank Islam antarabangsa itu suatu peluang untuk mengemukakan, dalam apa-apa tempoh yang tidak kurang daripada empat belas hari sebagaimana yang dinyatakan dalam pemberitahuan itu, sebab mengapa syarat lesen itu tidak patut diubah atau dibatalkan atau syarat atau syarat tambahan tidak patut dikenakan.

(3) Jika suatu lesen adalah tertakluk kepada syarat, bank Islam antarabangsa hendaklah mematuhi syarat itu.

(4) Mana-mana bank Islam antarabangsa yang tidak mematuhi mana-mana syarat lesennya melakukan suatu kesalahan dan boleh, apabila disabitkan, didenda tidak melebihi dua puluh ribu ringgit.

Lesen di bawah Bahagian ini tidak boleh diberikan dalam hal tertentu

30D. (1) Tiada seorang pun boleh diberikan suatu lesen di bawah seksyen 30B dan tiada seorang pun yang dilesenkan di bawah seksyen itu boleh menjalankan perniagaan di Malaysia tanpa kebenaran bertulis Menteri jika—

(a) dalam hal suatu syarikat, wang modalnya yang tidak terjejas oleh kerugian atau selainnya adalah kurang daripada amaun minimum; atau

(b) dalam hal suatu institusi asing, wang kerja bersihnya yang tidak terjejas oleh kerugian atau selainnya adalah kurang daripada amaun minimum.

(2) Bagi maksud seksyen ini—

“amaun minimum” ertinya apa-apa amaun wang modal atau apa-apa amaun wang kerja bersih yang hendaklah disenggarakan oleh suatu bank Islam antarabangsa sebagaimana yang ditetapkan oleh Menteri atas syor Bank Negara melalui pemberitahuan dalam *Warta*;

“wang kerja bersih” ertinya apa-apa liabiliti bersih institusi asing di luar Malaysia sebagaimana yang ditakrifkan dan dikira mengikut apa-apa cara yang dinyatakan melalui notis secara bertulis dari semasa ke semasa oleh Bank Negara; dan

“wang modal” ertinya modal berbayar dan rizab dan apa-apa sumber modal lain sebagaimana yang ditakrifkan dan dikira mengikut apa-apa cara yang dinyatakan melalui notis secara bertulis dari semasa ke semasa oleh Bank Negara.

(3) Penetapan amaun minimum yang hendaklah disenggarakan di bawah subseksyen (2) hendaklah dipatuhi dalam apa-apa tempoh tangguhan yang sama yang tidak kurang daripada tiga bulan sebagaimana yang dinyatakan dalam pemberitahuan itu.

Pemakaian peruntukan Akta ini kepada bank Islam antarabangsa

30E. (1) Bagi mengelakkan keraguan, diisytiharkan bahawa suatu bank Islam atau bank Islam antarabangsa hendaklah, berkenaan dengan perniagaan bank Islam antarabangsa yang dijalankan olehnya, menjadi tertakluk kepada peruntukan Akta ini, dan mana-mana peruntukan Akta ini yang terpakai bagi bank Islam hendaklah terpakai bagi bank Islam antarabangsa seolah-olah sebutan mengenai bank Islam dalamnya ialah sebutan mengenai bank Islam antarabangsa melainkan jika diperuntukkan secara khusus dalam Bahagian ini.

(2) Bagi maksud subseksyen (1), Menteri atas syor Bank Negara boleh melalui perintah yang disiarkan dalam *Warta* membuat apa-apa ubah suaian kepada mana-mana peruntukan Akta ini sebagaimana yang difikirkannya patut.

BAHAGIAN VI

KUASA PENGAWASAN DAN PENGAWALAN KE ATAS BANK ISLAM

Penyiasatan mengenai bank

31. Bank Negara hendaklah dari semasa ke semasa menyiasat secara rahsia, buku, akaun dan transaksi bagi setiap bank Islam dan bagi mana-mana cawangan, agensi atau pejabat di luar Malaysia yang dibuka oleh sesuatu bank Islam.

Penyiasatan khas mengenai bank

32. Menteri boleh pada bila-bila masa mengarahkan Bank Negara membuat sesuatu penyiasatan, secara rahsia, mengenai buku, akaun dan transaksi sesuatu bank Islam, jika dia ada sebab bagi mempercayai bank Islam itu adalah menjalankan perniagaannya dengan cara yang memudaratkan kepentingan pen depositnya dan

pemiutang yang lain, atau mempunyai aset yang tidak mencukupi untuk meliputi liabilitinya kepada awam, atau melanggar peruntukan Akta ini atau peruntukan Akta Bank Negara Malaysia 1958.

Pengemukaan buku dan dokumen bank

33. (1) Tertakluk kepada subseksyen (2), bagi maksud sesuatu penyiasatan di bawah seksyen 31 atau 32, sesuatu bank Islam hendaklah membenarkan Bank Negara akses kepada buku, akaun dan dokumennya dan hendaklah memberikan apa-apa maklumat dan kemudahan sebagaimana yang dikehendaki untuk menjalankan penyiasatan itu.

(2) Buku, akaun dan dokumen tidaklah dikehendaki dikemukakan pada bila-bila masa dan di mana-mana tempat yang akan mengganggu perjalanan wajar perniagaan harian biasa bank itu.

(3) Mana-mana bank Islam yang tidak membenarkan akses kepada buku, akaun dan dokumennya atau tidak memberi maklumat dan kemudahan mengikut subseksyen (1) melakukan suatu kesalahan dan boleh, apabila disabitkan, didenda tidak melebihi empat ribu ringgit bagi tiap-tiap hari keingkaran itu berterusan.

(4) Bagi maksud sesuatu penyiasatan di bawah seksyen 31 atau 32, semua pegawai dan pekerja Bank Negara hendaklah disifatkan sebagai pekhidmat awam mengikut pengertian Kanun Keseksaan [*Akta 574*].

Kerahsiaan bank

34. (1) Kecuali sebagaimana yang diperuntukkan dalam seksyen 31 dan 32, tiada apa-apa jua dalam Akta ini boleh memberi kuasa kepada Menteri untuk mengarahkan Bank Negara, atau boleh memberi kuasa kepada Bank Negara, supaya menyiasat secara khusus mengenai hal ehwal mana-mana pelanggan individu sesuatu bank Islam dan apa-apa maklumat bersampingan yang berhubungan dengan hal ehwal pelanggan individu itu yang diperolehi oleh Bank Negara dalam pemeriksaan atau penyiasatan yang dibuat oleh Bank Negara di bawah peruntukan Akta ini hendaklah menjadi rahsia antara Bank Negara dengan bank itu.

(2) Tiada apa-apa jua dalam seksyen ini boleh disifatkan mengehendakan apa-apa kuasa yang diberi kepada Mahkamah Tinggi atau seseorang Hakimnya oleh Akta Buku Tunai Bank (Keterangan) 1949 [Akta 33] atau melarang pematuhan sesuatu perintah yang dibuat di bawah Akta itu.

(3) Kecuali dengan keizinan secara bertulis Bank Negara dan setakat yang dinyatakan dalamnya, tiada seorang pun pegawai sesuatu bank Islam dan tiada seorang pun yang kapasiti atau jawatannya boleh dengan apa-apa cara mempunyai akses kepada rekod bank itu, daftar atau apa-apa surat menyurat atau bahan berkenaan dengan akaun mana-mana pelanggan individu bank itu boleh memberikan, menzahirkan atau mendedahkan apa-apa jua maklumat berkenaan dengan wang atau butir-butir lain yang berkaitan dengan akaun pelanggan itu melainkan jika—

- (a) pelanggan itu atau wakil dirinya memberi kebenarannya untuk berbuat demikian;
- (b) pelanggan itu diisytiharkan bankrap; atau
- (c) maklumat itu dikehendaki untuk menilai kepercayaan kredit pelanggan itu berkenaan dengan sesuatu transaksi komersial *bona fide* atau sesuatu transaksi komersial prospektif.

(4) Subseksyen (3) tidak terpakai bagi pendedahan maklumat atau dokumen kepada—

- (a) mana-mana pengarah, pegawai, pekerja atau ejen Perbadanan Insurans Deposit Malaysia (selepas ini dalam perenggan ini disebut sebagai “Perbadanan”) yang ditubuhkan di bawah Akta Perbadanan Insurans Deposit Malaysia 2005 jika pendedahan itu adalah bagi maksud penjalanan kuasa, pelaksanaan fungsi atau penunaian kewajipan Perbadanan atau pengarah, pegawai, pekerja atau ejen Perbadanan di bawah Akta itu; atau
- (b) juruaudit yang dilantik di bawah seksyen 17, pegawai dan pekerja bank yang bermastautin di Malaysia.

(5) Seseorang yang bertindak dengan melanggar peruntukan seksyen ini melakukan suatu kesalahan dan boleh, apabila disabitkan, dikenakan denda tidak melebihi empat puluh ribu ringgit atau dipenjarakan selama suatu tempoh tidak melebihi tiga tahun atau kedua-duanya.

Tindakan yang hendak diambil jika pendahuluan adalah bertentangan dengan kepentingan pendeposit

35. (1) Tiap-tiap bank Islam hendaklah menghantar kepada Bank Negara dalam apa-apa tempoh yang ditetapkan melalui notis secara bertulis dari semasa ke semasa oleh Bank Negara selepas hari akhir setiap satu bulan suatu pernyataan mengikut bentuk yang akan ditetapkan oleh Bank Negara yang menunjukkan butir-butir mengenai semua pendahuluan, pinjaman atau kemudahan kredit yang telah diberikan olehnya kepada—

- (a) mana-mana perbadanan yang disifatkan berkaitan dengan bank itu sebagaimana yang diperihalkan dalam seksyen 6 Akta Syarikat 1965;
- (b) mana-mana perbadanan atau syarikat awam yang disebutkan dalam subseksyen 25(4); dan
- (c) mana-mana individu yang mengenainya dan menerima firma atau perbadanan yang dalamnya mana-mana daripada pengarahnya mempunyai kepentingan, secara langsung atau secara tidak langsung, sebagaimana yang diisytiharkan di bawah seksyen 28, selain pendahuluan, pinjaman dan kemudahan kredit yang butir-butir mengenainya telah pun diberi menurut perenggan yang terdahulu.

(2) Jika atas pemeriksaan butir-butir yang diberi oleh sesuatu bank Islam di bawah subseksyen (1) Bank Negara berpendapat bahawa apa-apa pendahuluan, pinjaman atau kemudahan kredit itu diberi dengan memudaratkan kepentingan pendeposit bank itu, Bank Negara boleh dengan perintah secara bertulis melarang bank itu daripada memberi apa-apa pendahuluan, pinjaman atau kemudahan kredit selanjutnya atau mengenakan apa-apa sekatan yang difikirkan patut oleh Bank Negara terhadap pemberiannya, dan boleh selanjutnya mengarahkan supaya bank itu mendapatkan pembayaran balik mana-mana pendahuluan, pinjaman atau kemudahan kredit itu dalam apa-apa tempoh dan setakat yang dinyatakan dalam perintah itu.

(3) Mana-mana bank Islam yang telah diberi sesuatu perintah oleh Bank Negara menurut seksyen ini boleh merayu secara bertulis kepada Menteri, dan Menteri boleh, sebagaimana yang difikirkannya patut, mengesahkan, mengubah atau membatalkan perintah Bank Negara itu.

Bank yang tidak berupaya menunaikan obligasinya hendaklah memberitahu Bank Negara

36. Sesuatu bank Islam yang berpendapat bahawa ia mungkin tidak berupaya menunaikan obligasinya atau hampir hendak menggantung pembayaran hendaklah dengan serta-merta memberitahu Bank Negara tentang hakikat itu.

Tindakan oleh Bank Negara jika bank tidak berupaya menunaikan obligasinya atau menjalankan perniagaan secara yang memudarat kepada pendeposit

37. (1) Jika—

(a) sesuatu bank Islam memberitahu Bank Negara—

(i) bahawa ia berpendapat bahawa ia mungkin menjadi tidak berupaya menunaikan obligasinya; atau

(ii) bahawa ia hampir hendak menggantung pembayaran;

(b) sesuatu bank Islam menjadi tidak berupaya menunaikan obligasinya atau menggantung pembayaran; atau

(c) selepas sesuatu penyiasatan dibuat di bawah seksyen 31 atau 32 Bank Negara berpendapat bahawa sesuatu bank Islam—

(i) menjalankan amalan yang tidak sempurna atau tidak wajar;

(ii) mungkin menjadi tidak berupaya menunaikan obligasinya atau hampir hendak menggantung pembayaran;

(iii) telah melanggar atau tidak mematuhi mana-mana peruntukan Akta ini;

(iv) telah melanggar atau tidak mematuhi mana-mana syarat yang dikenakan ke atas lesennya; atau

(v) mungkin akan menjalankan perniagaannya secara yang memudaratkan kepentingan pendepositnya,

Bank Negara, dengan persetujuan Menteri, boleh menjalankan satu atau lebih daripada kuasa yang dinyatakan dalam subseksyen (2) sebagaimana yang difikirkannya perlu.

- (2) Tertakluk kepada subseksyen (1), Bank Negara boleh—
- (a) mengeluarkan perintah kepada bank supaya mengambil langkah-langkah yang difikirkan perlu oleh Bank Negara untuk membetulkan perkara itu dan bank itu hendaklah menjalankan perintah-perintah itu dalam masa yang ditetapkan oleh Bank Negara;
 - (b) melarang bank itu daripada memberikan apa-apa pendahuluan, pinjaman atau kemudahan kredit selanjutnya bagi apa-apa tempoh sebagaimana yang dinyatakan dan tertakluk kepada apa-apa pengecualian, jika ada, dan syarat lain sebagaimana yang dikenakan oleh Bank Negara;
 - (c) memecat daripada jawatan mana-mana pengarahnya atau melantik mana-mana orang sebagai pengarahnya;
 - (d) melantik seseorang untuk menasihati bank itu tentang penjalanan wajar perniagaannya;
 - (e) mengambil alih kawalan dan menjalankan perniagaan bank itu atau melantik seseorang lain untuk mengambil alih kawalan dan menjalankan perniagaan bank itu; atau
 - (f) menyampaikan sesuatu petisyen kepada Mahkamah Tinggi meminta Mahkamah itu menggulung bank itu.
- (3) Jika Bank Negara telah melantik seseorang untuk—
- (a) menjadi seorang pengarah bank di bawah perenggan 2(c);
 - (b) menasihati bank tentang penjalanan wajar perniagaannya di bawah perenggan 2(d); atau
 - (c) mengambil alih kawalan dan menjalankan perniagaan bank itu di bawah perenggan 2(e),

Bank Negara boleh menetapkan saraan dan perbelanjaan yang akan dibayar kepada orang itu oleh bank.

Kesan pemecatan jawatan pengarah atau pelantikan seseorang pengarah sesuatu bank oleh Bank Negara

38. Jika Bank Negara telah bertindak di bawah perenggan 37(2) (c) berkenaan dengan sesuatu bank Islam, peruntukan yang berikut hendaklah berkuat kuasa:

- (a) walau apa pun yang terkandung dalam Akta Syarikat 1965 dan artikel persatuan bank itu, hak bagi anggota atau pemegang syer untuk memilih pengarah bank itu bagi menggantikan mereka yang telah dipecat daripada jawatan oleh Bank Negara hendaklah terhenti dijalankan;
- (b) mana-mana pengarah yang dipecat daripada jawatan di bawah perenggan itu hendaklah terhenti memegang jawatan, dan tidaklah berhak menuntut apa-apa pampasan kerana kehilangan atau penamatan jawatan; dan
- (c) tiap-tiap pemecatan atau pelantikan di bawah perenggan itu adalah muktamad dan konklusif dan tidak boleh disoal dalam mana-mana Mahkamah.

Pengawalan bank Islam oleh Bank Negara

39. (1) Jika Bank Negara telah mengambil alih kawalan, atau telah melantik seorang lain untuk mengambil alih kawalan, perniagaan sesuatu bank Islam menurut perenggan 37(2)(e), maka Bank Negara atau orang itu hendaklah, tertakluk kepada subseksyen (2), terus mengawal bank itu dan terus menjalankan perniagaan bank itu atas nama dan bagi pihak bank itu sehingga Bank Negara berpuas hati bahawa sebab yang kerananya ia mengambil alih kawalan atau telah melantik seorang lain untuk mengambil alih kawalan itu sudah tidak ada lagi.

(2) Jika Bank Negara telah mengambil alih kawalan, atau telah melantik seorang lain untuk mengambil alih kawalan, perniagaan sesuatu bank Islam menurut perenggan 37(2)(e), maka Mahkamah Tinggi boleh, atas permohonan bank itu, memerintahkan supaya Bank Negara hendaklah terhenti mengawal perniagaan bank itu mulai dari suatu tarikh yang dinyatakan dalam perintah itu jika Mahkamah Tinggi berpuas hati bahawa tidak lagi perlu bagi Bank Negara meneruskan kawalannya terhadap perniagaan bank itu untuk melindungi pendeposit bank itu.

(3) Jika Bank Negara telah mengambil alih kawalan, atau telah melantik seorang lain untuk mengambil alih kawalan, perniagaan sesuatu bank Islam menurut perenggan 37(2)(e), atau telah terhenti mengawal perniagaan sesuatu bank Islam menurut seksyen ini, maka Bank Negara hendaklah memberitahu fakta itu dalam *Warta*.

Bank Islam di bawah kawalan Bank Negara hendaklah bekerjasama dengan Bank Negara

40. (1) Jika Bank Negara telah mengambil alih kawalan, atau telah melantik seorang lain untuk mengambil alih kawalan, perniagaan sesuatu bank Islam menurut perenggan 37(2)(e), maka bank Islam itu hendaklah menyerahkan perniagaannya kepada kawalan Bank Negara atau kepada orang itu dan hendaklah memberi Bank Negara apa-apa kemudahan sebagaimana yang dikehendakinya untuk menjalankan perniagaan bank itu.

(2) Mana-mana bank Islam yang tidak mematuhi subseksyen (1) atau mana-mana kehendak Bank Negara di bawah subseksyen itu melakukan suatu kesalahan dan boleh, apabila disabitkan, didenda tidak lebih daripada satu ribu ringgit bagi tiap-tiap satu hari keingkaran itu berterusan.

Peluasan bidang kuasa kepada subsidiari bank

41. Apa-apa sebutan dalam Bahagian ini mengenai sesuatu bank Islam hendaklah dibaca sebagai termasuk sebutan mengenai sesuatu subsidiari bank Islam.

Moratorium

42. (1) Bank Negara boleh, dengan kelulusan Menteri, jika difikirkannya berfaedah kepada kepentingan pendeposit sesuatu bank Islam, membuat suatu perintah melarang bank itu daripada menjalankan perniagaan bank atau daripada melakukan atau melaksanakan apa-apa perbuatan atau fungsi yang berkaitan dengan perniagaan bank atau mana-mana aspeknya sebagaimana yang dinyatakan dalam perintah itu.

(2) Bank Negara boleh, dengan kelulusan Menteri, jika difikirkannya berfaedah kepada kepentingan pendeposit itu, memohon kepada Mahkamah Tinggi untuk suatu perintah yang

menahan permulaan atau penerusan mana-mana prosiding oleh atau terhadap bank itu berkenaan dengan apa-apa perniagaan bank itu. Perintah sedemikian adalah sah selama suatu tempoh tidak melebihi enam bulan.

(3) Selagi sesuatu perintah di bawah subseksyen (1) terus berkuat kuasa lesen yang diberi kepada bank di bawah Akta ini hendaklah digantung.

(4) Jika sesuatu perintah telah dibuat di bawah subseksyen (1), Bank Negara hendaklah memberitahu hakikat itu dalam *Warta*.

Pindaan perlembagaan bank

43. (1) Tiap-tiap bank Islam hendaklah, sebelum membuat apa-apa pindaan atau perubahan dalam memorandum persatuan atau artikel persatuan atau surat cara lain yang di bawahnya ia diperbadankan, memberi kepada Bank Negara butir-butir secara bertulis mengenai pindaan atau perubahan yang dicadangkan itu untuk kelulusannya.

(2) Tiap-tiap bank Islam hendaklah, dalam masa tiga bulan selepas dibuat apa-apa pindaan atau perubahan dalam memorandum persatuan dan artikel persatuan atau surat cara lain yang di bawahnya ia diperbadankan, memberi kepada Menteri melalui Bank Negara butir-butir secara bertulis (ditentusahkan melalui akuan berkanun yang dibuat oleh seorang pegawai kanan bank itu) mengenai pindaan atau perubahan itu.

(3) Mana-mana bank Islam yang tidak mematuhi kehendak subseksyen (1) atau (2) melakukan suatu kesalahan dan boleh, apabila disabitkan, didenda tidak melebihi dua ribu ringgit bagi tiap-tiap satu hari keingkaran itu berterusan.

BAHAGIAN VII

PELBAGAI

Indemniti

44. (1) Baik Kerajaan mahupun Bank Negara ataupun mana-mana pegawai salah satu daripadanya tidak boleh tertakluk kepada apa-apa tindakan, tuntutan atau permintaan oleh atau liabiliti kepada

mana-mana seorang berkenaan dengan apa-apa yang dilakukan atau ditinggalkan daripada dilakukan dengan suci hati menurut atau pada melaksanakan atau pelaksanaan yang dicadangkan atau berkaitan dengan pelaksanaan atau pelaksanaan yang dicadangkan, apa-apa kuasa yang diberi kepada Kerajaan, Bank Negara atau pegawai itu oleh Akta ini.

(2) Bagi maksud seksyen ini seseorang Menteri dan mana-mana pegawai awam hendaklah disifatkan sebagai seorang pegawai Kerajaan; dan Gabenor dan Timbalan Gabenor Bank Negara dan mana-mana pengarah atau pekerjanya dan mana-mana orang yang memegang apa-apa jawatan dalamnya atau yang dilantik oleh Bank Negara di bawah perenggan 37(2)(c), (d) atau (e) hendaklah disifatkan sebagai seorang pegawai Bank Negara.

Keutamaan deposit Islam

45. (1) Jika suatu bank Islam digulung di bawah perenggan 37(2)(f), hasil likuidasi bank Islam itu hendaklah, tertakluk kepada seksyen 10 Akta Prosiding Kerajaan 1956 [*Akta 359*] dan subseksyen (2), dibayar kepada pendeposit diutamakan atas semua liabiliti tidak bercagar lain mengikut cara yang berikut:

- (a) deposit Islam berdasarkan jagaan; dan
- (b) deposit Islam lain.

(2) Jika seseorang telah dilantik di bawah perenggan 37(2)(d) atau (e), mengikut mana-mana yang berkenaan, atau suatu bank Islam digulungkan di bawah perenggan 37(2)(f), segala kos, caj dan perbelanjaan wajar, termasuk saraan, orang yang dilantik itu hendaklah kena dibayar daripada aset bank Islam diutamakan atas segala tuntutan yang lain.

Penalti terhadap pengarah dan pengurus

46. (1) Mana-mana orang, sebagai pengarah atau pengurus bagi sesuatu bank Islam, yang—

- (a) tidak mengambil semua langkah yang munasabah supaya bank itu mematuhi kehendak Akta ini dan Akta Bank Negara Malaysia 1958 (kemudian dari ini dalam seksyen ini disebut “Akta itu”); atau

- (b) tidak mengambil semua langkah yang munasabah untuk memastikan betulnya sesuatu kenyataan yang dikemukakan di bawah peruntukan Akta ini atau Akta itu,

melakukan suatu kesalahan dan boleh, apabila disabitkan, didenda tidak melebihi dua puluh ribu ringgit atau dipenjarakan selama suatu tempoh tidak melebihi tiga tahun atau kedua-duanya.

(2) Dalam mana-mana prosiding terhadap seseorang di bawah subseksyen (1) adalah menjadi suatu pembelaan untuk membuktikan bahawa dia ada alasan yang munasabah untuk mempercayai bahawa seorang lain telah dipertanggungjawabkan dengan kewajipan bagi memastikan pematuhan kehendak Akta ini atau Akta itu atau kewajipan bagi memastikan bahawa kenyataan itu adalah tepat dan bahawa orang itu adalah kompeten dan boleh menunaikan kewajipan itu.

(3) Seseorang tidak boleh dijatuhkan hukuman pemenjaraan bagi apa-apa kesalahan di bawah subseksyen (1) melainkan jika pada pendapat Mahkamah, dia telah melakukan kesalahan itu dengan sengaja.

Kesalahan oleh pengarah, pekerja dan ejen

47. Mana-mana pengarah, pengurus, pemegang amanah, juruaudit, pekerja atau ejen mana-mana bank Islam yang—

- (a) dengan sengaja membuat atau menyebabkan dibuat sesuatu catatan palsu dalam mana-mana buku rekod atau dalam mana-mana laporan, slip, dokumen atau penyata mengenai perniagaan, hal ehwal, transaksi, keadaan, aset atau akaun bank itu; atau
- (b) dengan sengaja meninggalkan daripada membuat sesuatu catatan dalam mana-mana buku rekod atau dalam sesuatu laporan, slip, dokumen atau penyata mengenai perniagaan, hal ehwal, transaksi, keadaan, aset atau akaun bank itu, atau dengan sengaja menyebabkan apa-apa catatan itu ditinggalkan daripada dicatatkan; atau
- (c) dengan sengaja mengubah, mengeluarkan, menyembunyi atau memusnahkan sesuatu catatan dalam mana-mana buku rekod atau dalam mana-mana laporan, slip, dokumen atau penyata mengenai perniagaan, hal ehwal, transaksi, keadaan, aset atau akaun bank itu, atau dengan sengaja menyebabkan catatan itu diubah, dikeluarkan, disembunyikan atau dimusnahkan,

melakukan suatu kesalahan dan boleh, apabila disabitkan, didenda tidak melebihi lima puluh ribu ringgit atau dipenjarakan selama suatu tempoh tidak melebihi lima tahun atau kedua-duanya.

Kesalahan oleh syarikat dsb., dan oleh pekhidmat dan ejen

48. (1) Jika apa-apa kesalahan terhadap mana-mana peruntukan Akta ini telah dilakukan oleh sesuatu perbadanan, firma, pertubuhan atau kumpulan orang lain, mana-mana orang yang pada masa berlakunya kesalahan itu ialah seorang pengarah, pengurus, setiausaha atau pegawai seumpamanya yang lain atau berupa sebagai bertindak atas sifat sedemikian hendaklah disifatkan bersalah atas kesalahan itu melainkan jika dia membuktikan bahawa kesalahan itu telah dilakukan tanpa persetujuannya atau tanpa dibiarkan olehnya dan bahawa dia telah menjalankan segala usaha untuk mencegah berlakunya kesalahan itu sebagaimana yang sepatutnya dijalankan olehnya, memandangkan kepada jenis fungsinya atas sifat itu dan kepada semua hal keadaan.

(2) Jika mana-mana orang boleh dikenakan di bawah Akta ini apa-apa hukuman atau penalti bagi apa-apa perbuatan, peninggalan, keabaiian atau keingkaran, dia boleh dikenakan hukuman atau penalti yang sama bagi setiap perbuatan, peninggalan, keabaiian atau keingkaran kerani, pekhidmat atau ejen atau kerani atau pekhidmat ejen itu, dengan syarat bahawa perbuatan, peninggalan, keabaiian atau keingkaran itu telah dilakukan oleh kerani atau pekhidmat itu dalam perjalanan pekerjaannya, atau oleh ejen itu apabila bertindak bagi pihak orang itu, atau oleh kerani atau pekhidmat ejen itu apabila bertindak dalam perjalanan pekerjaannya dalam sesuatu hal keadaan bahawa jika perbuatan, peninggalan, keabaiian atau keingkaran itu telah dilakukan oleh ejen itu, maka prinsipalnya boleh dikenakan hukuman di bawah seksyen ini.

Kakitangan dilarang menerima komisen

49. Mana-mana pengarah, pegawai atau pekerja sesuatu bank Islam atau orang lain iaitu orang yang menerima saraan daripada bank Islam itu, yang meminta atau menerima, mengizinkan atau bersetuju untuk menerima apa-apa hadiah, komisen, emolumen, perkhidmatan, ganjaran, wang, harta atau barang yang bernilai untuk faedah dan keuntungan dirinya sendiri atau untuk faedah atau keuntungan saudara-maranya, daripada mana-mana orang selain bank itu, kerana mendapatkan atau berusaha untuk mendapatkan bagi mana-mana orang apa-apa pendahuluan, pinjaman atau kemudahan

kredit daripada bank itu atau pembelian atau diskaun bagi apa-apa draf, nota, cek, bil pertukaran atau obligasi lain oleh bank itu, atau kerana membenarkan mana-mana orang mengeluarkan lebih daripada sesuatu akaunnya dengan bank itu, melakukan suatu kesalahan dan boleh, apabila disabitkan, didenda tidak melebihi dua puluh ribu ringgit atau dipenjarakan selama suatu tempoh tidak melebihi tiga tahun atau kedua-duanya.

Penalti am

50. Mana-mana bank Islam yang melanggar atau tidak mematuhi mana-mana peruntukan Akta ini atau peraturan-peraturan yang dibuat di bawahnya yang baginya tiada penalti diperuntukkan dengan nyata melakukan suatu kesalahan dan boleh, apabila disabitkan, didenda tidak melebihi lima puluh ribu ringgit.

Kuasa Gabenor untuk mengkompaun

51. (1) Gabenor Bank Negara, dengan persetujuan Menteri, boleh mengkompaun mana-mana kesalahan yang boleh dihukum di bawah Akta ini dengan menerima apa-apa jumlah wang, sebagaimana yang difikirkannya patut, yang tidak melebihi amaun denda maksimum yang boleh dikenakan ke atas orang itu jika dia telah disabitkan atas kesalahan itu.

(2) Apa-apa wang yang dibayar kepada Gabenor menurut peruntukan subseksyen (1) hendaklah dibayar ke dalam dan menjadi sebahagian daripada Kumpulan Wang Disatukan.

Keizinan Pendakwa Raya

52. Tiada pendakwaan berkenaan dengan apa-apa kesalahan di bawah Akta ini boleh dimulakan tanpa keizinan secara bertulis Pendakwa Raya.

Peraturan-peraturan

53. (1) Bank Negara boleh dengan kelulusan Menteri membuat apa-apa peraturan sebagaimana yang dikehendaki dari semasa ke semasa untuk melaksanakan tujuan Akta ini.

(2) Tanpa menyentuh keluasan makna subseksyen (1), peraturan-peraturan boleh dibuat—

- (a) untuk mengadakan kawalan oleh Bank Negara berkenaan dengan pemerolehan atau pemegangan oleh sesuatu bank Islam syer sesuatu perbadanan atau pemerolehan atau pemajuan oleh bank itu apa-apa harta tak alih;
- (b) untuk mengadakan kawalan oleh Bank Negara berkenaan dengan sesuatu bank Islam yang menjadi suatu pekongsi atau tuan punya mana-mana firma dengan liabiliti tidak terhad;
- (c) untuk mengadakan kawalan oleh Bank Negara berkenaan dengan pemberian apa-apa kemudahan kredit kepada mana-mana orang bagi maksud membiayai pemerolehan atau pemegangan harta tak alih, syer dan kontrak dalam kredit pengguna dan serahan hadapan komoditi;
- (d) untuk membuat peruntukan mengenai pengisytiharan oleh pengarah bank Islam kepada lembaga pengarah bank Islam itu masing-masing tentang bilangan dan perihalan apa-apa syer dalam mana-mana perbadanan yang dipegang oleh mereka atau sebagai amanah bagi mereka atau yang mereka mempunyai apa-apa hak untuk menjadi pemegang (sama ada dengan bayaran atau tidak) atau yang dalamnya mereka mempunyai, secara langsung atau secara tidak langsung, apa-apa kepentingan benefisial, dan jenis kepentingan mereka sebagai pekongsi, pengarah, pengurus atau ejen dalam mana-mana firma atau perbadanan;
- (e) untuk membuat peruntukan mengenai pengisytiharan oleh pengarah eksekutif, pegawai dan pekerja bank Islam kepada lembaga pengarah bank Islam itu masing-masing atau mana-mana orang lain sebagaimana yang ditetapkan dalam peraturan-peraturan tentang jenis kepentingan berikut yang dipegang oleh atau bagi pihak mana-mana daripada mereka atau mana-mana daripada suami atau isteri atau anak mereka:
 - (i) bilangan dan perihalan apa-apa syer dalam mana-mana perbadanan yang dipegang oleh atau sebagai amanah bagi pihak mana-mana pengarah eksekutif, pegawai, pekerja, suami atau isteri atau anak itu

atau yang dia mempunyai apa-apa hak untuk menjadi pemegang (sama ada dengan bayaran atau tidak) atau yang dalamnya dia mempunyai, secara langsung atau secara tidak langsung, apa-apa kepentingan benefisial;

(ii) jenis apa-apa kepentingan sebagai pekongsi, pengarah, pengurus atau ejen dalam mana-mana firma atau perbadanan; dan

(iii) semua aset lain; dan

(f) untuk membuat peruntukan bagi apa-apa perkara yang berhubungan dengan pengawalseliaan dan pengawasan bank Islam antarabangsa.

Kuasa untuk mengeluarkan garis panduan, dsb.

53A. Bank Negara atau Menteri boleh, dari semasa ke semasa, mengeluarkan apa-apa garis panduan, surat pekeliling atau nota sebagaimana yang difikirkan suai manfaat atau perlu oleh Bank Negara atau Menteri bagi menguatkuasakan tujuan Akta ini.

Hari kelepasan bank

54. Tiada bank Islam boleh menguruskan apa-apa perniagaan dengan awam pada mana-mana hari yang diisytiharkan sebagai hari kelepasan bank di bawah peruntukan-peruntukan *subseksyen 120(1) Akta Bank dan Institusi-Institusi Kewangan 1989.

Pemakaian undang-undang lain

55. Mana-mana bank Islam yang diperbadankan di bawah Akta Syarikat 1965 hendaklah tertakluk kepada peruntukan Akta itu serta juga kepada peruntukan Akta ini, kecuali bahawa jika ada apa-apa percanggahan atau ketidakselarasan antara peruntukan Akta itu dengan peruntukan Akta ini, maka peruntukan Akta ini hendaklah dipakai.

*CATATAN – Sebelum ini, subseksyen 57(1) Akta Bank 1973 [*Akta 102*].

Pengecualian

56. Menteri boleh dengan syarat atau tanpa syarat, mengecualikan mana-mana bank Islam daripada mana-mana peruntukan Akta ini.

BAHAGIAN VIII

PINDAAN BERBANGKIT

Pindaan Akta Bank 1973

57. (1) Seksyen 2 Akta Bank 1973 adalah dipinda—

(a) dengan memasukkan sebaik selepas takrif “bank berlesen” takrif baru yang berikut:

‘ “bank Islam” ertinya sesuatu bank yang dlesen di bawah Akta Bank Islam 1983;’; dan

(b) dengan memasukkan sebaik selepas perkataan “bank berlesen yang lain” dalam takrif “lain-lain tanggungan deposit”, “tanggungan bermasa”, dan “tanggungan semasa” perkataan “, mana-mana bank Islam”.

(2) Seksyen 9 Akta Bank 1973 adalah dipinda dengan menggantikan perenggan 1(b) dengan yang berikut:

“(b) tiada sesuatu bank boleh kemudian dari ini diberi lesen atas suatu nama yang termasuk—

(i) mana-mana daripada perkataan-perkataan “Kebangsaan”, “Komanwel”, “Malaysia”, “Malaysia” sebagai kata sifat, “Negara”, “Negeri”, “Persekutuan”, “Persekutuan” sebagai kata sifat atau “Rizab”;

(ii) mana-mana perkataan “Islam” atau “Muslim” atau apa-apa perkataan lain yang boleh ditakrifkan sebagai bererti bahawa bank itu menguruskan perniagaan bank Islam,

sama ada dalam bahasa kebangsaan atau bahasa Inggeris atau dalam apa-apa bahasa lain.”.

(3) Seksyen 59 Akta Bank 1973 dipinda dengan memotong perkataan “dan” pada penghujung perenggan 1(b), menggantikan noktah pada akhir perenggan (c) subseksyen itu dengan koma bertitik

dan memasukkan selepasnya perkataan “dan”, dan memasukkan selepas sahaja perenggan itu perenggan baru (*d*) yang berikut:

“(d) mana-mana bank Islam.”

Pindaan Akta Syarikat 1965

58. (1) Seksyen 4 Akta Syarikat 1965 adalah dipinda dengan memasukkan sebaik selepas perkataan “1973” dalam takrif “banking corporation” perkataan “and an Islamic bank as defined in the Islamic Banking Act 1983”.

(2) Seksyen 218 Akta Syarikat 1965 adalah dipinda dengan menggantikan perenggan(1)(j) dengan yang berikut:

“(j) the company has held a licence under the Banking Act 1973 or the Islamic Banking Act 1983, and that licence has been revoked or has expired and has not been renewed; or”.

Pindaan Ordinan Bank Negara Malaysia 1958

59. (1) Seksyen 2 Ordinan Bank Negara Malaysia 1958, yang disebut “Ordinan” dalam seksyen ini, dipinda—

(a) dengan memasukkan sebaik sebelum koma bertitik pada penghujung takrif “bank” perkataan “or the Islamic Banking Act 1983”;

(b) dengan memasukkan sebaik selepas takrif “Governor” takrif baru yang berikut:

“investment account liabilities” in relation to an Islamic bank means the deposit liabilities at that bank in respect of funds placed by a depositor with that bank for a fixed period of time under an agreement to share the profits or losses of that bank on the investment of such funds;

“Islamic bank” means a bank licensed under the Islamic Banking Act 1983;’; dan

- (c) dengan memasukkan selepas sahaja perkataan “in relation to a bank” dalam takrif “other deposit liabilities” perkataan “other than an Islamic bank” dan dengan memasukkan sebaik selepas koma bertitik pada penghujung takrif itu perkataan yang berikut:

“and in relation to an Islamic bank means deposit liabilities at that bank other than saving account, investment account, sight and time liabilities and deposit liabilities from another bank or the Central Bank;”.

- (2) Seksyen 37 Ordinan adalah dipinda—

- (a) dengan memasukkan selepas sahaja perkataan “payable to or by banks” dalam perenggan 1(b) perkataan “other than Islamic banks”;

- (b) dengan memasukkan selepas sahaja perkataan “each bank” dalam perenggan 1(c) perkataan “, other than an Islamic bank,” dan menggantikan noktah pada penghujung perenggan dengan koma bertitik;

- (c) dengan memasukkan selepas sahaja perenggan 1(c) perenggan baru (d) yang berikut:

“(d) a reserve to be held by each Islamic bank at the Central Bank comprising such amounts expressed as a percentage of each bank’s sight, saving account, investment account, time and other deposit liabilities as may be approved by the Minister on the recommendation of the Board, whether denominated in Malaysian or foreign currency.”; dan

- (d) dengan memasukkan sebaik selepas perkataan “paragraph (c)” dalam subseksyen (2) perkataan “or (d)”.

- (3) Seksyen 41 Ordinan dipinda dengan menggantikan perkataan “banks or groups of banks” dalam perenggan pertama dengan perkataan “banks other than Islamic banks or groups of such banks, nor shall it discriminate among Islamic banks or groups of Islamic banks,”.

- (4) Seksyen 42 Ordinan dipinda dengan memasukkan sebaik selepas perkataan “Banking Act, 1973” perkataan “or the Islamic Banking Act 1983.”

- (5) Seksyen 51 Ordinan adalah dipinda—
- (a) dengan memotong perkataan “interest charge” dalam perenggan 4(a); dan
 - (b) dengan memotong perkataan “interest” dalam perenggan 4(b).

Pindaan Akta Syarikat Kewangan 1969

60. Seksyen 2 Akta Syarikat Kewangan 1969 dipinda dengan menggantikan perkataan “untuk menjalankan perniagaan bank dalam Persekutuan” dalam takrif “bank” dengan perkataan “di bawah Akta Bank 1973 atau sesuatu bank Islam yang dilesen di bawah Akta Bank Islam 1983”.

UNDANG-UNDANG MALAYSIA**Akta 276****AKTA BANK ISLAM 1983**

SENARAI PINDAAN

Undang-undang yang meminda	Tajuk ringkas	Berkuat kuasa dari
Akta A634	Akta Bank Islam (Pindaan) 1985	10-01-1986
Akta 330	Akta Kewangan Bank dan Institusi Kewangan) 1986	01-01-1987
Akta A1145	Akta Bank Islam (Pindaan) 2002	01-03-2002
Akta A1214	Akta Bank Islam (Pindaan) 2003	01-01-2004
Akta A1255	Akta Bank Islam (Pindaan) 2005	01-04-2006
Akta A1307	Akta Bank Islam (Pindaan) 2007	31-07-2007

UNDANG-UNDANG MALAYSIA**Akta 276****AKTA BANK ISLAM 1983****SENARAI SEKSYEN YANG DIPINDA**

Seksyen	Kuasa meminda	Berkuat kuasa dari
2	Akta A1255 Akta A1307	01-04-2006 31-07-2007
3	Akta A1214 Akta A1255	01-01-2004 01-04-2006
6	Akta A1214	01-01-2004
11	Akta A1255	01-04-2006
13A	Akta A1214	01-01-2004
16	Akta A1255	01-04-2006
19	Akta 330 Akta A1145	01-01-1987 01-03-2002
22	Akta A1255	01-04-2006
25	Akta A634	10-01-1986
27A	Akta A634	10-01-1986
30A-30E	Akta A1307	31-07-2007
34	Akta A1255	01-04-2006
45	Akta A1255	01-04-2006
53	Akta A1307	31-07-2007
53A	Akta A1307	31-07-2007
56	Akta A1307	31-07-2007
